

Ki Gempia Petenday Sinulat ni JUAN

Mendadi, ki kepaat librunen dig Begu Pasad kini, iin su sinulat ni Juan. Si Juan kini, sa' sungunen na metubus sulatayi sinulaten, sinulaten ma'nini', "Melaun pai tu'us pinggulaula ni Isus di gedapan nu nga sakupen, laak nda' mesulat dig libru kini. Laak su gikteben kini, sinulat adun metuudan amu dun pu' si Isus su Tindu' nu Megbebaya' Meglekaunutan, sug Bata' nu Megbebaya'. Pu' sa' metuudan amu dun, naa mpeduma amu tu ketubu' nda'i tamanen, meksekat tu pegbaya'en." (20:30-31) Kaas subay peksiba'an penilungay nu nga getaw kig libru kini, pu' gembagel gupiai pantagen.

Naa kini si Isus kini, adin getaw iin? Alandun demai gasalen? Sa' penilungen nu getawig libru kini, iin dayuni sembagen. Bekna, si Isus, iin su Talu' nu Megbebaya'. (1:1-14) Kedua'en, iin su Nati Karniru, guliden tu Megbebaya'. (1.29, 36) Ketelunen, iin su Tindu' nu Megbebaya' Meglekaunutan. (1.41) Kapaaten, iin sug Bata' nu Megbebaya'. (1.49) Kelimanen, iin su Gadi' nu nga getaw Israel. (1.49) Ke'enemen, iin su Meglegawen di tiba'an getaw dig lumbang kini. (4.42) Kepitunen, iin su tinalu' nu sala tawan peneliganen, si Tomas, laungen, "Ya'ai Kaunutan ku, ya'ai Megbebaya' pektemuyen ku." (20.28)

Mendadi ita nu nga getaw nemun, adun metuudan ita dun dadema, sinulat ni Juan dinii nga mekesalebu' pinggulaula ni Isus. Bekna si Isus, pibaluyen su tubig penguinemen. (2:1-11)

Kedua'en, piuli'ananig bata' nu kaunutan. (4:46-54)

Ketelunen, piuli'anen dademai getaw dia geksid bule-naw. (5:1-18)

Kepaaten, pinaanen pa pagid sug lima ngibu tawan. (6:6-13)

Kelimanen, mipanaw dig dibabaw tubig. (6:16-21)

Ke'enemen, piuli'anenig buta, mibuta sikna mbata'en. (9:1-7)

Katapusanen, pitubu'en puli' si Lazaro. (11:1-45)

Muka' mibetang dadema dini, tiga'wan, kini si Isus, mitubu' puli' genat minatay, muka' pilentu ditu gekbus langit, ditu Keglekaunutanen.

Naa si Juan kini, su suminulat dun ini, adin getaw iin? Iini sala tawan di ngag bekna suminakup dini Isus. Dinig libru kini, piningalanan dun dig lawasen su sakup ni Isus petailenen.

Su Talu' Miksibaluy Getaw

¹ Dngantu, su nda' pa mbaali gekleb langit bu' lupa', kini si Isus, daan na. Iin sug duma nu Megbebaya'. Gelalen su Talu' muka' iin dademai Megbebaya'. ² Genat di pikpuunan nug launanen, iinig duma nu Megbebaya'. ³ Adin su binaal, pibaal nu Megbebaya' diniin. Nda'iduni mibaal, iini minaal dun. ⁴ Ki Talu' kini, iini pikpuunan nu ketubu'. Kagina iini mekpetubu' tu getaw, mekpedelag tug delendeman nu nga getaw. ⁵ Dumilag su tiag dig dialem medelem, nda' magaw nu medelem.

⁶ Naa duuni getaw tindu' nu Megbebaya', ngalanan si Juan. Kini si Juan, sinugu' nu Megbebaya' ⁷ mangay megukit di nga getaw mekatag di getaw piningalan dun su tiag, adun medengeg nilan muka' metuudan ilan dun, launan nilan. ⁸ Kana' nu tiag, laak sinugu' ukitanen su nga getaw mekatag di tiag. ⁹ Su tantu tiag si Isus, luminusad na

dinig lumbang mekpedelag dig delendeman nug launan getaw.

¹⁰ Mendadi si Isus, gelalen su Talu', midinig lumbang kini. Laak, pia pibaal diniin nu Megbebaya' sug lumbang, nda' mailala nu nga kilawan. ¹¹ Minangay ditug daan benwanen, laak nda' penemba'ay nu nga samanen getaw Judea. ¹² Pia ma'antu, duuni minemba' diniin. Adin su nga minemba' diniin, su nga mikpetuud gupia diniin, diadia bigayanen pegbaya' beta'en nu Megbebaya'. ¹³ Mikenduta'i kebata' dinilan? Kana' gasal getawi puunanen. Nda' ilan pegigetaw ngag bata' nu kinilawan, pu' su Megbebaya' nai tantu Gama' nilan.

¹⁴ Mendadi ki Talu' kini, miksibaluy getaw. Suminala dinami megbenwa, kaas minita' nami su kelengas nu pegbaya'en, pu' saba' iinig buntung Bata' nu Gama' ta Megbebaya'. Nda'iduni gikteben su tulungen di nga getaw muka' su ketuuden.

¹⁵ Naa si Juan kiin, duuni gendaw miktalu' mekatag di Talu' kini. Minekeg mektalu', laungen, “Kini da sug bekna pektelu'en ku diniu pu' duuni metua', mbinaya' pa dinaan, laak pia ma'antu, metaas pai pegbaya'en batul danaan, pu' su nda' pau pegigetaw, daan nain.”

¹⁶ Naa, kagina nda'i giktebeni tulungen dinita, pepi-anan ita niin gebii gendaw, launan ta. ¹⁷ Dngantu pisuunan ita ni Moises tu Palinta nu Megbebaya', laak nemun, pibian dini Isukristu, mbianan ta su tulungen muka' su ketuuden. ¹⁸ Nda'i getaw mikaita' ditu Megbebaya'. Su da laak buntung Bata'en, sug дума nu Gama'en Megbebaya', iini mikpesuun dun tu nga getaw.

*Su Kektitulu' ni Juan su Memunag Tubig
(Mateo 3:1-12; Marcos 1:1-8; Lucas 3:1-18)*

¹⁹ Naa mendadi su nga kaunutan nu nga getaw Judea tu Jerusalem, suminugu' ilan di ngag belian nilan muka' nga

sapu' ni Levi meditu ni Juan kia, adun saaken nilan diniin, “Naa ya'a, alanduni gelal mu?”

²⁰ Mendadi kini si Juan, nda' pegbelibad sumbag dun, miglegintuud gupia, laungen, “Kana'u nu Tindu' nu Megbebaya' Meglekaunutan.”

²¹ Sinaak nilan, “Sa' ma'nia, alanduni gelal mu? Si Eliasa?”

Simbag ni Juan, “Kana'en.”

Sinaak na nilan pelum, “Su ba pedetengen nami Pimuunan nu Megbebaya'?”

“Kana',” simbag ni Juan.

²² “Mendadi,” laung nilan, “pesuun mu dinami sa' ta'i gelal mu, adun mesembag nami su nga suminugu' dinami medini ni'a. Ta'i ketalu' mu mekatag dig lawas mu?”

²³ Sa' ma'nia, inalap dayun ni Juan sembagen su sinulat dengantu ditu Misulat Talu' nu Megbebaya' nu pimuunanen si Isaias, laungen,

“Naani ‘mektawag diag limawa’,’ laung ku,

‘Pelegdeng niu kig dalam nu Kaunutan Megbebaya!’ ”*

²⁴ Naa su nga sinugu' kia, sinugu' ilan nu pikumpungan nu getaw Judea piningalan dun Pariseo. ²⁵ Kali' ilan saak pelum dini Juan, “Naa mauma dema memunaga tubig tu getaw, sa' kana' ya'a su Tindu' nu Megbebaya' Meglekaunutan muka' kana'a ni Elias, muka' kana'a dadema nu Pimuunan nu Megbebaya'?”

²⁶ Kali' sembag si Juan, “Naan kini, megbunagu laak tubig tu nga getaw. Dagit duuni megduma diniu, nda' niu mailala. ²⁷ Iin, mbinaya' pa dinaan, laak pia su sepatusen, kana'u bantang megubad dun diniin.”

* 1:23 1:23 Sa'itada, pepengendamen nu getaw su ginaa nilan tu kenemba' nilan tu Kaunutan Megbebaya'.

²⁸ Naa kig launanen kia, ditug Betania mipenggulaula, tug dipag Jordan, dia tanda' mimunag si Juan tubig tu nga getaw.

Su Nati Karniru nu Megbebaya'

²⁹ Mendadi bena' migendaw, kini si Isus, minita' tu'u ni Juan misebang pangay dia niin. Kali' pektalu' si Juan, "Aa naa, kiin na tu'u su piningalan dun Nati Karniru nu Megbebaya', su mbaal guliden tu Megbebaya', pu' adun mpedasun su sala' nu tiba'an getaw!" ³⁰ Iini tinalu'u sug laung ku, 'Duuni sungu metua', mbinaya' pa dinaan, laak pia ma'antu, metaas pa gupia dinaan, pu' su nda' pau pegigetaw, daan nain.' ³¹ Naa sug bekna," laung pa ni Juan, "nda'u iin mailala. Laak dagid iini mitua'u dun memunag tubig tu getaw, pu' adun pailalau iin di nga getaw Israel."

³² Mendadi tinakesi'an ni Juan si Isus, laungen, "Minita'u sug Balakat nu Megbebaya' luminusad genat tu gekbus langit, miglanguban di ma'niin palas limuun, dayun nda' na awa' diniin. ³³ Nda'u pain mailala, dagid su Megbebaya', su suminugu' dinaan memunagu tubig tu nga getaw, daan na miktalu' dinaan, 'Maita' mu sug Balakat nu Megbebaya' lumusad muka' ndi' na mawa' di getaw. Mendadi ki getaw kiin, iin su bunagenen tu nga getaw sug Balakat nu Megbebaya'.'" ³⁴ Diksu' ni Juan, "Naa kagina minita'u tu'u, talu'u diniu, iinen na tu'u sug Bata' nu Megbebaya'."

Su ngag Bekna Sakup ni Isus

³⁵ Naa bena' miksala gendaw, dia na puli' pegindeg si Juan, ilan nu sakupen dua' tawan. ³⁶ Mendadi, minita' ni Juan si Isus minayan dia. Kali' pektalu' si Juan, "Naa, bentayay pa daan niu, kia na su Nati Karniru nu Megbebaya'!"

³⁷ Naa kig dua' tawan kini sakup ni Juan, bena' midengeg nilani tinalu'en kia, lindug nilan si Isus. ³⁸ Luminingay dayun si Isus, minita'en ilan miglendug diniin. Sinaaken dinilan, "Ta' alanduni penengaun niu?"

Kali' ilan sembag, "Rabi, adin ka pektulugan?" (Su gelalen Rabi, guluganen, "Mekpetu'un.")

³⁹ Simbag ni Isus, "Tendug amu dinaan, adun niu maita'." Mendadi tumindug ilan tu'u diniin, minita' nilan dema su pegbenwananen, lilabung ilan dayun dia niin. (Pu' ginenga' na menaugi gendaw gembaba'.)

⁴⁰ Naa sala tawan di nga mikedengeg tu tinalu' ni Juan kia dayun miglendug dini Isus, iin si Andres, pated ni Simon Pedro. ⁴¹ Si Andres, linaawanen dayun ki gulangbata'en si Simon, laungen diniin, "Minita' na nami su Tindu' nu Megbebaya' Meglekaunutan." (Naa ki gelalen "Tindu' nu Megbebaya' Meglekaunutan," iin su gulugan nu ngalanen si Kristu.) ⁴² Inunutan dayun ni Andres si Simon ditu ni Isus.

Mendadi si Isus, pingenglenganen si Simon, kali' pektalu' diniin, "Ya'a si Simon, bata' ni Juan. Dagid genat nandaw, paingalan dini'a, si Cefas." (Su ngalan Cefas, guluganen "batu," sala ngalanen si Pedro.)

Pisakup ni Isus si Felipe muka' si Natanael

⁴³ Bena' miksala gendaw, pigdelendem ni Isus meditu Galilea. Mendadi linaawaneni sala tawan si Felipe, kali' pektalu' diniin, "Pegdunuta dinaan!" ⁴⁴ (Naa kini si Felipe, getaw Betsaida, sug lunsud dadema ni Andres bu' ni Pedro.) ⁴⁵ Mendadi si Felipe, linaawanen si Natanael, kali' dayun pektalu' diniin, "Minita' na nami su sinulat ni Moises ditu Misulat Palinta nu Megbebaya', su sinulat dadema nu ngag duma pimuunan nu Megbebaya' dengantu. Ngalanen si Isus, bata' ni Jose, getaw Nazaret."

⁴⁶ Dagid kini si Natanael, kali' sembag, “Baa, duun bai melengas megenat dig lunsud Nazaret kiin?”

“Naa, tenduga dinaan,” laung ni Felipe, “adun mu maita'.”

⁴⁷ Mendadi kini si Isus, bena' minita'en si Natanael pegangay dia niin, kali' pektalu' di ngag dumanen, “Bentayay pa daan niu, ki getaw kia, tantu getaw Israel. Nda'ig limbungen!”

⁴⁸ Sinaak ni Natanael dini Isus, “Ta' mai kailala mu dinaan?”

“Su nda'a pa melaaway ni Felipe,” laung ni Isus, “minita'u ya'a minilunga dia gayu igera.”

⁴⁹ “Aa naa, Sir,” simbag ni Natanael, “sa' ma'antu, ya'a na gupia sug Bata' nu Megbebaya'! Ya'a su Gadi' nami nu nga getaw Israel!”

⁵⁰ Kali' pektalu' si Isus, “Mituudan ka ba dinaan saba' di tinalu'u kia pu' minita'u ya'a sa' minilunga diag igera? Maita' mu pa ki mekesalebu' padun gupia! ⁵¹ Taman talu'u diniu, maita' pa niu kig langit mpuka', muka' ki nga sesugu'en nu Megbebaya' getaw langit luntu muka' lumusad dinaan kini, kig Bata' nu Kilawan.”

2

Sug Bela'i tu Cana

¹ Naa genat itu di ketelu endawen, duunig bela'i tug lunsud Cana sakup Galilea. Suminaup tug bela'i su gina' ni Isus, ² pisebutan dadema si Isus kampu' nu nga sakupen. ³ Mendadi bena' migela' nai penguinumen, laung nu gina' ni Isus diniin, “Ki penguinumen nilan, migela' na daw.”

⁴ “Baa,” simbag ni Isus, “ndi' mau pegbia'ay. Nda' pa dateng su gendawu.”

⁵ Kali' dayun pektalu' su gina' ni Isus di nga megilak, “Adin su telu'enen diniu, petuud niu.”

⁶ Naa su nga getaw Judea, duuni ngag betad nilan mekatag di kengugas adun mawa' su kelemu'ay nilan. Kaas duuni genem buuk gunsu' dia bitangan tubig pengu-gas, kada salabuuk gunsu', melepisanen saani paat buuk taru saba' kebagelen. ⁷ Mendadi kini si Isus, miktalu' di nga megilak, "Pepenu' niu tubig ki nga gunsu' kini." Bitangan nilan dayun tubig, pilepeng nilan tug baba'en. ⁸ Laung dayun ni Isus, "Naa, saguk amu dun, uit niu dia meguit dig bela'i." Iwitan nilan dun dayun iin. ⁹ Ininaman dayun nu meguit dig bela'i ki tubig kini binaluy na peng-inumen. Sinabinen dayun su menginsawa, pu' nda'en suunay ki pigenatan nu penguinumen kini (asa misuunan nu nga megilak kia, su miksaguk dun). ¹⁰ Laung nu meguit tug bela'i dia menginsawa, "Sa' su kelaun duma getaw, un-aanen peksuday su mekepia penguinumen. Bena' melaun nai mi'inum nu nga suminaup, peksudenen dayun pelum su sinukalay. Digid ya'a, masi' sinawad mu ki mekepia penguinumen kini, iin mu pa peksuday!"

¹¹ Kiniig bekna mekesalebu' tu'us pinggulaula ni Isus. Pinggulaulanen dia Cana sakup Galilea. Ma'nia, pinita'en di nga getaw ki kelengas nu pegbaya'en, kaas mikpetuud dayun diniin su nga sakupen.

¹² Naa mendadi, tumigbeng dayun si Isus tu Caper-naum, ilan nu gina'en, su nga pateden muka' nga sakupen. Migbebenwa ilan dayun dia nga santa' gebii.

Pingutidan ni Isus su Mendagang Guliden tu Penedapan tu Megbebaya'

(Mateo 21:12-13; Marcos 11:15-17; Lucas 19:45-46)

¹³ Naa sa' sungu mektelipuun sug Lumpuk nu nga getaw Judea gindan ditug Liniusan, miditu si Isus syudad Jerusalem. ¹⁴ Bena' midepet tug Balay Penedapan tu Megbebaya', mitaanganen ki nga mendagang guliden, su

nga meksesaluy baka, karniru muka' malepati. Minita'en dadema ki nga membeles selapi', dia ilan peging kud lemisaan nilan. ¹⁵ Mendadi kini si Isus, minimud tali, binaalen dayun badas, pingutidanen ilan dayun dia Penedapan, pimugawen dadema dia ki ngag baka muka' karniru. Binunagen pa pagid su selapi' nu nga memeles selapi', muka' pimbekiwangen su ngag lemisaan nilan. ¹⁶ Miktalu' si Isus tu nga mendagang malepati, "Awa' niu dini! Ndi' niu baalay tebu'an kig Balay kini Penedapan tu Gama'u!" ¹⁷ Milabu' dayun dig delendeman nu nga sakupen su sinulat dengantu ditu Misulat Talu' nu Megbebaya', laung, "Mibagai gangitu, uu Megbebaya', miksekat di kepetailu tu Penedapan dini'a."

¹⁸ Mendadi duuni nga kaunutan nu getaw Judea suminaak dini Isus, "Duun bai mekesalebu' paita' mu dinami, tu'us di pegbaya' mu menggulaula dun kia?"

¹⁹ Kali' sembag si Isus, "Naa kig Balay kini Penedapan tu Megbebaya', geba' niu. Dayun gikteb telu endaw, baalen ku puli'."

²⁰ "Apelii lai!" laung nilan. "Paat pulu' bu' enem taun pegbaalayi Penedapan kini. Dayun baalen mu puli' gikteb telu endaw?"

²¹ Laak dagid kig balay kia tinalu' ni Isus, piuluganen dunig lawasen. ²² Mendadi bena' pitubu' puli' si Isus, milabu' dayun dig delendeman nu nga sakupen su tinalu'en kia. Mituudan ilan dayun ditu sinulat dengantu ditu Misulat Talu' nu Megbebaya' mekatag diniin, sampay tu tinalu' kia ni Isus.

Misuunan ni Isus sug Delendemen nu Tiba'an Getaw

²³ Naa selian ni Isus dia Jerusalem mitaang dig Lumpuk nug Linius, melaun getaw mikpetuud diniin sa' minita' nilan su nga mekesalebu' tu'us pinggulaulanen. ²⁴ Laak

nda' pesalig dinilan si Isus, pu' sinuunanenig betad nilan, tiba'an nilan. ²⁵Ndi' kambat pesuunan dun, pu' migela'en mesuunay sug dialem delendeman nu getaw.

3

Kuminita' dini Isus si Nicodemo

¹ Naa duuni kaunutan nu getaw Judea ngalanan si Nicodemo, sakup di pikumpungan nu Pariseo. ² Mendadi duuni gebii, kini si Nicodemo, luminabet dini Isus, kali' pektalu' diniin, “Naa Sir, misuunan nami pu' mekpetu'un ka genat tu Megbebaya'. Pu' nda'i getaw mekenggulaula di nga mekesalebu' tu'us mu kia, subay ebangan nu Megbebaya'.”

³ Si Isus, kali' sembag, “Taman talu'u dini'a, ndi' mpe-dumai getaw tu Keglekaunutan nu Megbebaya', subay megigetaw iin puli'.”

⁴ Kali' dayun saak si Nicodemo, “Endunen ma duni kegigetaw puli' nu megulang getaw? Mesu'at ba mpuli' ditu tian nu gina'en dayun megigetaw puli'?”

⁵ Kali' sembag si Isus, “Taman talu'u dini'a, nda'i getaw mekesakup tu Keglekaunutan nu Megbebaya', subay megigetaw pebian di tubig muka' pebian dig Balakat nu Megbebaya'. ⁶ Adin su megigetaw mekpuun di kilawan, kilawan dademai gasalen. Sa' su megigetaw mekpuun dig Balakat nu Megbebaya', diniwata dademai gasalen. ⁷ Ndi'a mesebu'an dun su tinalu'u dini'a pu' subay megela' amu megigetaw puli'. ⁸ Pinanggi'u tu genus. Su gengayan nu genus, su genus laaki metau dun. Medengeg mu, laak ndi' mu mesuunani gengayanen sampay pigenatanen. Naa, ma'antu dadema su megigetaw di pegbaya' nug Balakat nu Megbebaya', ndi' mu mesuunan sa' mikenduta' dun.”

⁹ “Apelai,” laung ni Nicodemo, “kenduta' main?”

¹⁰ Kali' sembag si Isus, "Aa, ya'a kini, memintulu'a nu getaw Israel, laak nda' mu ba mesuunay ia? ¹¹ Taman talu'u dini'a, pektelu'en nami diniu su misuunan nami, pegukiten nami su minita' nami, laak ndi' amu metuudan dun. ¹² Naa sa' ndi' amu metuudan dun su tinalu'u mekatag di gempenggulaula dinig lubang, metuudan bamu dun su telu'en ku mekatag dig langit? ¹³ Nda'i getaw mikelentu adun meditug langit, subay laak sug luminusad, sug Bata' nu Kilawan, naan.

¹⁴ "Naa dengantu, si Moises kiin, selian nu nga getaw Israel dia pa limawa', binaalenig ledawan, mamak galang. Ininaten dayun bitangen ditu patal nu sekuden. Naan, mpema'niin dau dema, subay mainat dau dema dayun mbetangu di pasek, ¹⁵ pu' adun, adin su getaw metuudan dinaan, begayan ketubu' nda'i tamanen. ¹⁶ Pu' kagina melelaat gupia su Megbebaya' di tiba'an getaw, bigayen matay sug buntung Bata'en, adun adin su metuudan diniin, ndi' matay, segaga begayan ketubu' nda'i tamanen. ¹⁷ Kana' iini sinugu' dun nu Megbebaya' kig Bata'en lumusad dinig lubang pu' adun mengukum tu tiba'an getaw. Segaga iin sungkini luminusad dun dinig lubang, meglegawen tu tiba'an getaw.

¹⁸ "Mendadi adin su metuudan dinaan, kig Bata' nu Megbebaya', ndi' ukuman di melaat. Laak dagid adin su memilas dinaan, duun nai ginukuman dun, pu' nda'en seligayig buntung Bata' nu Megbebaya'. ¹⁹ Iini kaukum dun. Ki tiag, luminusad dinig lubang, laak pimilas nu nga getaw. Mauya'an nilan su medelem sabaya' su tiag, pu' melaat gupiai pigbetad nilan. ²⁰ Adin su getaw penggulaulaanen su melaat, mpauk ditu tiag. Ndi' mekpesempel di tiag, adun ndi' medayag su penggulaulaanen nda'i pantagen. ²¹ Laak dagid adin su getaw melengasi pegbetadenen mikpuun tu metuud, naa mekpesempel

di medelag, adun maita' gupia su penggulaulaanen, pu' dunutanen sug delendeman nu Megbebaya'."

Si Isus muka' si Juan su Memunag Tubig

²² Naa tubus itu, miditu si Isus prubinsya Judea, ilan nu nga sakupen. Migbebenwa ilan dia nda' maiben, pimbunagan ni Isus tubig su nga getaw. ²³ Naa si Juan, migbunag dadema tubig tu nga getaw diag benwa Enon, mesempel tug lunsud Salim, pu' melaun tubig dia. Melaun getaw miditu niin, binunagan ilan dayun ni Juan tubig. ²⁴ (Su timpu kia, nda' pa mpirisu si Juan.)

²⁵ Mendadi duuni nga sakup ni Juan muka' sala tawan getaw Judea, miglantugi' ilan mekatag di kengugas adun mawa' su kelemu'ay nu getaw. ²⁶ Sa' ma'nia, minadap dini Juan su nga sakupen kia, laung nilan diniin, "Sir, ki tinakesi'an mu duma mu kiin ditug dipag Jordan, mimunag nain tubig di nga getaw, muka' meditu niin su kelaun getaw!"

²⁷ Kali' sembag si Juan, "Petekenen na niu, pu' pia ta' taway dun, nda'iduni mpenggulaulanen subay bi-gay dun nu Megbebaya'. ²⁸ Misuunan da niu gupia su tinalu'u diniu, pu' kana' naan su pedetengen Tindu' nu Megbebaya' Meglekaunutan. Laak dagid pisuun ku diniu sinugu'u laak nu Megbebaya' pepengendamen ku su nga getaw di pegdateng nu Tindu'en kiin. ²⁹ Naa, iin pitanggi'u di menginsawa. Danu menginsawa su penginsawaan. Leliagen su sambaten samalakinen, su pegindeg dia gupiden muka' mekineeg, pu' medengegen su tingeg nu menginsawa. Naa, ma'niin dinaan. Bena' medengegu pu' duuni getaw suminakup dini Isus, megela'ig leliagu. ³⁰ Sug dengengan ni Isus, subay megdugang, sug danaan, megengkan."

Ki Getaw genat tug Langit

³¹ Naa, ki getaw kini genat tug langit, iin si Isus, su tampusan metaas. Su genat dinig lumbang, piktu'unen sug betad dinig lumbang, pu' iini pigenatanen. Su genat tug langit, nda' naig lumabaw diniin. ³² Ukitenen su minita'en muka' su midengegen, laak dagid pemilasan nu nga getaw su gukitenen. ³³ Laak adin su menemba' ditu telu'enen, peglegintuudenen pu' su Megbebaya'i puunan nu metuud. ³⁴ Pu' su sinugu' nu Megbebaya' medini, bigayan gupia Balakat nu Megbebaya', kaas petendayen su talu' nu Megbebaya'. ³⁵ Petailen gupia nu Gama' Megbebaya' sug Bata'en, kaas pipegbaya' nu Megbebaya' dig Bata'en sug launanen. ³⁶ Mendadi adin su mekpetuud tug Bata' nu Megbebaya', si Isus kini, iini begayan ketubu' nda'i tamanen. Adin su memilas diniin, ndi' medawat nu Megbebaya', pu' ndi' meleknas diniin su gangit nu Megbebaya'.

4

Migabitabit diag Delungan si Isus muka' sug Libun

¹⁻³ Naa ki nga Pariseo kini, midengeg nilan pu' melaun getaw daw pisakup ni Isus muka' binunaganen tubig, melaun pa dig dani Juan. (Asa kana' si Isusi mimunag tubig, su laak nga sakupen.) Naa bena' misuunan ni Isus su telu'en nu nga Pariseo, migawa' dayun diag benwa Judea, ilan nu nga sakupen, minuli' ilan tu Galilea. ⁴ Laak subay minayan ilan tug benwa Samaria.

⁵ Bena' dia na Samaria si Isus, midepet tug lunsud Sikar, mesempel dig lupa' bigay dengantu ni Jacob tug bata'en si Jose. ⁶ Dia pa sug delungan pigbaal ni Jacob. Dayun migingkud si Isus dia gupid nug delungan kia, pu' bilayan saba' nu kepanawen. Duun saan miktui gendaw.

⁷ Mendadi, duunig libun mitua' diag delungan kia, pu' mangay tubig. Laung ni Isus diniin, "Begayay mau di tubig

kiin.” ⁸ (Naa su nga sakupen, minundas ilan tug lunsud menaluy gaan.)

⁹ “Aba,” simbag nug libun kia, “mauma pinengian mau tubig, asa ya'a, getaw Judeaa, muka' naan, getaw Samaria mau?” (Pu' su nga getaw Judea muka' getaw Samaria, migbanta ilan.)

¹⁰ Kali' sembag si Isus, “Naa sa' misuunan mu siaig begay nu Megbebaya' di nga getaw, muka' sa' mi'ilala mu sia ki minengi dini'a kini tubig, naa ya'a siai menengi dinaan tubig. Begayu dayun dini'a ki tubig mekpetubu' di getaw.”

¹¹ “Naa Sir,” laung nug libun, “nda'iduni sigeb mu, medalem dademaig delungan kini. Adin mu elapay ki tubig mekpetubu' di getaw? ¹² Muka' kedua'en, su ginepu'ay nami si Jacob, pingumbilinen dinamiig delungan kini, iin dademai ginumanen, ilan nu ngag bata'en, pia su nga petubu'enen. Ya'a, metaasa pa ba dini Jacob?”

¹³ Sumimbag si Isus, “Adin su minum di tubig dig delungan kini, kuaun da puli'. ¹⁴ Digid adin su minum di tubig begayu, ndi' na puli' kuaun. Kig begayu diniin, mbaluy maa' nu tebud dig dialem delendeman nu getaw, pu' mekegbegay gupia diniin ketubu' nda'i tamanen.”

¹⁵ “Sir!” laung nug libun. “Sa' mesu'at, begayay mau dun ki tubig kiin, adun ndi' nau kuaun puli', muka' ndi' nau megangay tubig dini.”

¹⁶ Kali' sembag si Isus, “Naa, laaway mu deli' su sawa mu, peduma mu dayun mpuli' dini.”

¹⁷ Kali' sembag, “Nda'iduni sawau.”

Laung ni Isus, “Wa'a daan, metuud, nda'iduni sawa mu.

¹⁸ Lima tawani minginsawa dini'a, muka' kig duma mu kiin nemun, kana' amu bila'i. Metuudi tinalu' mu kia.”

¹⁹ “Masi' daan, Sir,” laung nug libun, “pimuunan ka nu Megbebaya'. ²⁰ Naa su ginepu'ay nami, miktamuy ilan

tu Megbebaya' dinig bentud kini. Laak yamu nga getaw Judea, laung niu subay ditu da daw Jerusalem pektemuyay su Megbebaya'."

²¹ Kali' pektalu' si Isus, "Aa lai, petuud mau, duuni gendaw mateng, su nga getaw, ndi' nailan mektamuy tu Gama' ta dinig bentud kini sampay ditu Jerusalem. ²² Yamu nu nga getaw Samaria, nda' niu mesuunay su tantu pektemuyen niu. Yami nu nga getaw Judea, misuunan nami su pektemuyen nami, pu' su keglegawen di kilawan, mikpuun di getaw Judea. ²³ Laak duuni gendaw mateng, mektamuy su nga getaw tu Megbebaya' meksekat di ginuung nug Balakaten, pektemuyen nilan su tantu Diwata. Ma'antu su kektamuy nilan, iin sug betad mauya'an nu Gama' ta Megbebaya'. Muka' ki gendaw kia, minateng na tu'u. ²⁴ Ndi' maita' su Megbebaya', kaas su nga mektamuy dun, subay meksekat dig Balakat nu Megbebaya' su kektamuy nilan diniin, pu' adun pektemuyen nilan su tantu Diwata."

²⁵ Laung nug libun, "Naa misuunan ku duuni gendaw, mateng su Tindu' nu Megbebaya' Meglekaunutan, su piningalan dun si Kristu. Naa sa' mateng iin, pesuunenen daw dinita sug launanen."

²⁶ Kali' pektalu' si Isus, "Kig duma mu kini megabitabit, iin naini, naan ma."

²⁷ Naa iin dademai kedadeng puli' nu nga sakup ni Isus. Misebu'an ilan dun gupia pu' dumanen megabitabit, libun. Laak nda'i mekaku' sumaak tug libun sa' ta' mai tuyu'en, atawaka sumaak dini Isus sa' ta' mai migabitabit ilan dun.

²⁸ Mendadi binilin nug libun dia sug bandi bitanganen tubig, minuli' dayun tug lunsud, inukitanen dayun su nga getaw dia, laungen, ²⁹ "Dunutay niau, paita'u diniu ki migukit dinaan tu kelaun mipenggulaulau genat

kaika'ayu. Ta' ma, kana' ba iinen na saan su Tindu' nu Megbebaya' Meglekaunutan?" ³⁰ Bena' midengeg nu nga getaw su tinalu' nug libun kia, migawa' ilan diag lunsud, miditu ilan ni Isus.

³¹ Mendadi su keteliud nug libun, ginuut sia nu nga sakupen si Isus, laung nilan, "Sir, aan ka deli!"

³² Digid simbag ni Isus dinilan, "Duun nai gaan ku, ki nda' niu mesuunay."

³³ Bena' midengeg nu nga sakupen, miksinaakay ilan, laung nilan, "Aw, masi' duuni migilak diniin saanan ta ditug lunsud?"

³⁴ Laak kali' pektalu' si Isus, "Ini ma'niin gaan ku, su kegdunutu tu mauya'an nu suminugu' dinaan, muka' su ketubusu di pibaalen dinaan. ³⁵ Duuni penelu'en niu pu' paat bulan dekag pai meglegani.* Laak talu'u diniu, pengmata amu, pegbentayay niu su ngag binaalan duminialag na, mpia na geniin. ³⁶ Su meglegani, sukayan, pu' empunenen su ginani, su bigayan di ketubu' nda'i tamanen. Su memula talu' nu Megbebaya' di ginaa nu nga getaw, muka' su meglegani, meksamasama ilan dayun leliagay. ³⁷ Metuud su penelu'en niu pu' sala laungi memula, salai gumani. ³⁸ Sinugu'u amu gumani dinig benwa nda' niu pengimbaalay. Lain tawani mingimbal dini, laak mi'ilasan amu di sengku'en."

³⁹ Mendadi, melaun getaw Samaria dig lunsud kia mikpetuud dini Isus saba' nu tinalu' nug libun kia, "Inukiten dinaan su kelaun pinggulaulau genat kaika'ayu." ⁴⁰ Sa' ma'nia, bena' minangay dia ni Isusi nga getaw Samaria kia, ginuut nilan tunlen pa dia nilan, midua' gebii pa si Isus dia nilan.

* 4:35 4:35 Miksamingay si Isus mekatag di nga getaw miuya' na sumakup tu Megbebaya', damikian dun kig binaalan, sa' gempia na geniin.

⁴¹ Muka' melaun pa padun getaw Samaria mikpetuud dini Isus sa' midengeg nilan su talu'en na gupia. ⁴² Laung nilan tug libun kia, “Bekna, mikpetuud ami saba' nu ginukit mu. Laak nemun, telinga na namii mikedengeg di piktu'unen, kaas mituudan ami gupia, iini tantu Meglegawen tu tiba'an getaw.”

Piuli'an ni Isus sug Bata' nu Kaunutan

⁴³ Bena' mipapas naig dua' gebii kia, minundas si nga Isus tu Galilea. ⁴⁴ Selian nilan mpanaw, kali' pektalu' si Isus, “Ki pimuunan nu Megbebaya', ndi' pegbesaan diag daan benwanen.” ⁴⁵ Laak bena' minateng ilan dia Galilea, pinemba' si Isus nu nga getaw dia, pu' mikesaup ilan tug Lumpuk kiin tug Liniusan ditu Jerusalem, kaas minita' nilan su kelaun pinggulaula ni Isus saanan nug lumpuk kitu.

⁴⁶ Naa mipuli' si Isus tu Cana, sakup Galilea, sug lunsud tanda' pibaluyen penginumeni tubig. Naa duuni getaw dia metaasi gelalen, pegladu kig bata'en ditu Capernaum. ⁴⁷ Mendadi bena' midengeg nu metaas getaw kia su kedateng ni Isus dia Galilea genat tu Judea, linaawanen si Isus, pinenginen dayun diniin meditu Capernaum meneguli' tug bata'en, pekagawinaa na. ⁴⁸ Dagid kali' pektalu' si Isus diniin, “Paa, yamu pa di getaw, sa' ndi' niu maita'i mekesalebu' penggulaula muka' tu'us, ndi' amu mekpetuud.”

⁴⁹ “Sir,” laung nu kaunutan, “dunuta dema tu'u dinaan, pu' mbuus matayig bata'u.”

⁵⁰ Kali' sembag si Isus diniin, “Naa, uli'a na. Metubu' da kig bata' mu!”

Mituudan dun dayun ki getaw kia tu tinalu' ni Isus, dayun muli'. ⁵¹ Mendadi saananen muli' tug benwanen, suminungkak diniin su nga sesugu'enen, laung nilan,

“Mitubu' da sug bata' mu!” ⁵² Sinaaken dayun dinilan sa' ta' urasay dun mikpuuni kepia ginaa nug bata'en. Kali' ilan sembag, “Kalabung di palisi gendaw ki kawa' panasen.” ⁵³ Milabu' dayun dig delendeman nu gama'en, mitaang dun gupia su ketalu' ni Isus diniin, “Metubu' da sug bata' mu.” Mikpetuud dayun dini Isus, sampay su nga kelaun gapenen.

⁵⁴ Kini kedua' mekesalebu' pinggulaula ni Isus sikna minateng dia Galilea genat tu Judea.

5

Piuli'an ni Isusi Getaw tu Geksid Bulenaw

¹ Tubus itu, miglumpuk su nga getaw Judea ditu Jerusalem adun mektamuy tu Megbebaya', muka' suminaup dadema si Isus. ² Naa dia Jerusalem duunig bulenaw, mesempel di genga'an nug lunsud piningalan dun su Genga'an nu Karniru. Piningalan dun di Hinebreo sug bulenaw kia, Betsata. Lima buuki kemalig binaal dia, ³ megbelilid dia su nga pegladu. Melaun gupia pemegladu dia, duuni ngag buta, duun dademai nga mipilung muka' nga minatay seputul lawasen. [Pegelatan nilan ki keglibual nu tubig, ⁴ pu' taang dun, duuni sesugu'en nu Megbebaya' getaw langit lumusad dia tubig, meglibual dayun su tubig. Genat tu keglibual nu tubig, adin dayuni getaw mauna sugbu dia, mauli'an dayun, pia alandunig leduunen.] ⁵ Naa duuni sala tawan dia, telu pulu' bu' walu taun na migladu. ⁶ Mendadi si Isus, bena' minita'en ki pegladu kini muka' misuunanen miniben na megladu, sinaaken diniin, “Mauya'an mu ma mauli'an ka?”

⁷ Kali' sembagi pegladu kia, “Wa'a sia, Sir, laak sa' meglibual su tubig, nda'i megabang dinaan sugbu dia, kaas saanan ku sugbu sia, maunanan nau dumau.”

⁸ “Naa, pegbuata,” laung ni Isus. “Sikwat mui sinampuyuan dini'a kiin, muka' panawa.” ⁹ Mitekaw dayun mauli'ay. Sinikwaten tu'u su sinampuyuan diniin kia, dayun mpanaw.

Naa su kauli'ay nu getaw kia, mitaang di Gendaw Pelali. ¹⁰ Mendadi ki nga kaunutan nu getaw Judea, kali' ilan pektalu' tu piuli'an, “Naa, Gendaw Pelali maini. Binandu ma ditu Misulat Palinta nu Megbebaya', uiten mu nandawi sinampuyuan dini'a kiin.”

¹¹ Kali' sembag, “Ki getaw kiin mineguli' dinaan, tinalu'en dinaan, sikwaten kui sinampuyuan dinaan, muka' mpanawu.”

¹² Sinaak nilan pelum diniin, “Naa, ta' taway duni miktalu' dun dini'a?”

¹³ Naa ki piuli'an kia, nda'en suunay, pu' migawa' na dia si Isus adun meliawen su tebenan getaw.

¹⁴ Mendadi tubus itu nda' maiben, milabet ni Isus ki piuli'an kia diag Balay Pengedapan tu Megbebaya'. Kali' pektalu' si Isus diniin, “Naa, bentayay mu pa daan, miuli'an ka na. Ndi'a puli' pegbaal sala', pu' tekaw mbuus mbianan mui melaat pa ditug leduun mu kitu.”

¹⁵ Sa' ma'nia, mipuli' su miuli'an ditu nga kaunutan nu getaw Judea, pisuunen dinilan pu' si Isusi mineguli' dun.

¹⁶ Mendadi, iin dayuni puunan nu kegleget nu nga getaw Judea dini Isus, pu' mineguli' kia metaang di Gendaw Pelali. ¹⁷ Laak sumimbag si Isus dinilan, “Su Gama'u Megbebaya', nda'i kelalinen. Iin dademai pinunggilingan ku.”

¹⁸ Mendadi ki nga kaunutan nu nga getaw Judea, be-na' midengeg nilani tinalu' kia ni Isus, minamal laakig delendeman nilan petain nilan si Isus. Pu' pimilasen daw su Gendaw Pelali, muka' inangkenen pa padun, iini

Gama'en su Megbebaya', sa'itada pilepengenig lawasen tu Megbebaya'.

Su Pegbaya' ni Isus

¹⁹ Kali' gusay sembag si Isus di nga kaunutan, “Taman talu'u diniu, naan kini kig Bata'en, nda'iduni penggulaulaan ku sa' ndi'u maita' pu' iin dademai penggulaulaan nu Gama'u. Adin su penggulaulaan nu Gama'u, iin dademai penunggilingan ku. ²⁰ Pu' naan kini, kig Bata'en, petailenu nu Gama'u, kaas pinita'en dinaan sug launan penggulaulaanen. Muka' duuni mekesesebu' pa dun di kauli'ay nu mipilung kia, paita'en pa dinaan, kaas mesebu'an amu dun gupia. ²¹ Petubu'en puli' nu Gama'u su minatay. Naa ma'antu dadema danaan, adin su mauya'an ku, petubu'en ku dadema puli'. ²² Kana' na nu Gama'ui mengukum di nga getaw, pu' naan nai paukumenen dun, ²³ adun pegbesaanu nu ngag launan getaw maa' nu kegbasa nilan tu Gama'u. Adin su ndi' megbasa dinaan kig Bata'en, ndi' dadema megbasa tu Gama'u, pu' iini suminugu' dinaan medini.”

²⁴ Laung padun ni Isus, “Taman talu'u diniu, adin su mekedengeg tu telu'en ku muka' mekpetuud tu suminugu' dinaan, iini mpeduma tu ketubu' nda'i tamanen. Ndi' maukuman, pu' migawen na di kepatayen muka' mialapenig begu ketubu'. ²⁵ Taman talu'u diniu, sungu matengi gendaw mekedengeg di tingegu su nga minatay, pu' naanig Bata' nu Megbebaya'. Adin su mekedengeg di tingegu, mpeduma dayun di ketubu' nda'i tamanen. Muka' ki gendaw kia, minateng na. ²⁶ Naa su Gama'u, iini puun nu ketubu'. Ma'nia dadema naan, kig Bata'en. Bigayanu niin pegbaya'u, puun dau dema nu ketubu'. ²⁷ Bigayan dau niin dema pegbaya'u mengukum tu nga getaw, pu' naanig Bata' nu Kilawan. ²⁸ Mauma dema

mesebu'an amu dun su tinalu'u diniu? Bentayay pa daan niu, duun daani gendaw mateng medengeg nug launan minatay su tingegu²⁹ muka' megbuat ilan tu ngag lebeng nilan. Dayun adin su melengasi pigbetaden, iini metubu' puli' di nda'i tamanen. Muka' adin su melaati pigbetaden, megbuat tug lebengen, dayun iini ginukuman dun gupia, segbuun ditug linaw gapuy.”

Su nga Takesi' dini Isus

³⁰ Laung gusay ni Isus, “Nda'iduni penggulaulaan ku mikpuun tu pegbaya'u, laak dagid sa' mengukumu, iini pektalentedan ku, su da telu'en dinaan nu Gama'u, kaas melegdengi kengukumu, pu' medunut tu mauya'an nu Gama'u suminugu' dinaan, kana' nug danaan laak mauya'an.

³¹ “Naa sa' upama naani tumakesi' mekatag dig lawasu, ndi' kambat medawat su telu'en ku. ³² Laak tumu' duunig duma tumakesi' mekatag dinaan. Misuunan ku dadema pu' metuudi telu'enen mekatag dinaan. ³³ Naa si Juan, sa' piksaakan niu iin, miglegintuud mekatag dinaan. ³⁴ Laak naan, kana'u seligan takesi'anu nu nga getaw. Mitalu'u da dun diniu su mekatag dini Juan kia, adun megawen amu. ³⁵ Si Juan kiin, iin su maa' nu sulu' mikpedelag diniu, pisuunanen amu tu metuud. Miuya'an niu su piku'unen diniu, laak nda' maiben. ³⁶ Duun pai metaas takesi' di tinakesi'an ni Juan kiin. Adin su pipenggulaula dinaan nu Gama'u, iini takesi' mekatag dinaan pu' sinugu'u nu Gama'u Megbebaya' medini. ³⁷ Tuminakesi' dadema dinaan su Gama'u suminugu' dinaan, laak nda' niu mainsan medengeg su tingegen, muka' nda' niu mainsan maita' su palasen. ³⁸ Nda' niu pa pagid pektalentedan su talu' nu Gama'u, pu' ndi' amu metuudan dun su sinugu'en medini. ³⁹ Penilung niu su Misulat Talu' nu Megbebaya', pu' laung

niu dun sa' penemalan niu gupia besaay, mpeduma amu tu ketubu' nda'i tamanen. Laak dagid ki sinulat kiin, mikesikesi' dadema dinaan. ⁴⁰ Laak dagid pia mitakesi' anu dun, nda' amu pekpaingabang dinaan, adun mpeduma amu sia tu ketubu' nda'i tamanen.”

⁴¹ Diksu' ni Isus su talu'en, “Naa, kana'u tuyu' penalanu nu nga getaw. ⁴² Laak yamu nu nga kaunutan, misuunan ku sug betad niu, misuunan ku dadema pu' ndi' amu mekpetail tu Megbebaya'. ⁴³ Pigwekilanu nu Gama'u medini, laak dagid nda' niau penemba'ay. Sa' upama lain tawani medini mekpuun tu pegbaya'en laak, iini penemba'en niu. ⁴⁴ Iini mauya'an niu, mpenalan amu nu ngag duma niu, laak mpauk amu penalan nu Megbebaya' salanen da, kaas mekenduta' mai kekpetuud niu dinaan? ⁴⁵ Naa mabu' laung niu dun dengaten ku amu tu Gama'u. Ndi'u. Iini dumangat, si Moises, su siligan niu tantu. ⁴⁶ Laung niu dun mituudan amu ditu sinulat ni Moises, laak dagid sa' iin siai pituud niu, pituud niau dadema sia, pu' itu su sinulaten mekatag dinaan. ⁴⁷ Mendadi kagina ndi' amu mekpetuud ditu sinulat ni Moises, ndi' damu dema mekpetuud ditu petu'un ku.”

6

Pinaan ni Isus sug Lima Ngibu Tawan

(Mateo 14:13-21; Marcos 6:30-44; Lucas 9:10-17)

¹ Naa tubus itu, duminipag si Isus dig Linaw Galilea (sala piningalan dun sug Linaw Tiberias). ² Melaun gupia getaw miglendug dini Isus, saba' minita' nilan su nga mekesalebu' tu'us pinggulaulanen sa' pineguli'anen su pemegladu. ³ Tumiwad si Isus dig bentud, ilan nu nga sakupen, dayun ilan megingkud dia. ⁴ Naa sungu na mektelipuun sug Lumpuk tug Liniusan. ⁵ Mendadi, bena' midayag ni Isus su nga mimeglendug getaw pangay dia

niin, sinaaken dini Felipe, “Adin ta ma mesaluyi gaan, sukal paan ta sia di melaun getaw kini?” ⁶ (Naa su piksaak kini ni Isus dini Felipe, pingindananen laak si Felipe, pu' suunanen ki penggulaulaanen sungu.)

⁷ Kali' sembag si Felipe, “Ndi' ta megaga, pu' pia bali dua' gatus denario siai pan, kulang pa dinilan, pia pekaika'en gupia.”

⁸ Naa sala tawan sakup ngalanen si Andres, ngudan ni Pedro, laungen dini Isus, ⁹ “Duuni gembata' dini migbalun lima buuk pan sebada, muka' dua' buuk seda’.* Laak kenduta'en ta ma dun pekpaan di nga melaun getaw kini?”

¹⁰ “Naa, pemaing kud niui nga getaw kia,” laung ni Isus. (Pu' meliwagig lamalama dia.) Sa' ma'nia, mimeging kud dayun su nga getaw, duun saanig lima ngibu tawan su laak lumbus laki. ¹¹ Inalap dayun ni Isus ki pan kia, mikpal-adpalad tu Megbebaya', dayun pikilasilasen tu nga getaw pemeging kud dia. Ma'antu dadema sug dua' buuk seda', pikilasilasen dadema dinilan. Minaan dayun ki kelaun getaw, taman luminukas ilan maan. ¹² Naa bena' migela' ilan mbesug, laung ni Isus tu nga sakupen, “Pengkipes niui nga sawad, adun nda'iduni mekula'ula'.” ¹³ Kali' nilan pengkipesay, sepulu' bu' dua' dig belanani mipenu' pa nu sama' tug lima buuk pan sebada ginaan nu nga getaw kia.

¹⁴ Bena' minita' nu nga getaw ki mekesalebu' tu'us kia pinggulaula ni Isus, laung nilan, “Kini na tu'u su Pimuunan nu Megbebaya' pedetengen ta lumusad dinig lumbang!” ¹⁵ Laak si Isus, bena' misuunanen pu' sungu lumpakay nu nga getaw adun petegelan nilan sia megle-gadi' dinilan, laak migawa' dia nilan. Minundas salanen tug binentudan.

* 6:9 6:9 Ki sebada, ginis pimula maa' nug dawa muka' palay, baalen nu nga pubri getaw pan.

Mipanaw si Isus dig Dibabaw Tubig

(Mateo 14:22-33; Marcos 6:45-52)

¹⁶ Naa bena' mikagaw gebii bu' gendaw, duminiksun su nga sakup ni Isus tu geksid linaw. ¹⁷ Duminangan ilan di sekayan, suminakay ilan dayun dumipag pangay tug lunsud Capernaum. Gibii ilan diag linaw, laak nda' pa peglendug dinilan si Isus. ¹⁸ Duminuluki metiktegenus, mimukay sug linaw. ¹⁹ Naa bena' pimelulanan nilan, duun saanig lima kilumitruu giniginanen, minita' nilan si Isus, masi' pekpanaw diag dibabaw tubig, misebang dia sekayan nilan. Mipati' ilan mendek.

²⁰ Dagid miktalu' si Isus dinilan, “Naa, ndi' amu mendek. Naan daini!” ²¹ Pisakay nilan dayun iin dia sekayan nilan. Mitekaw dayun mateng tu pegengayan nilan su sekayan nilan kia.

Pinengaw nu nga Getaw si Isus

²² Naa bena' migendaw puli', su nga getaw mibilin ditug dipag, misuunan nilan pu' salabuuk laaki sekayan midenggu' dia kalabung, muka' sa' suminakay su nga sakupen, nda' pegdunut si Isus, su nga sakupen laaki suminakay. ²³ Naa duuni ngag duma sekayan genat tu Tiberias midenggu' dia tanda' mesempel pingaanan nilan nu nga pan kiin sa' genat mekpaladpalad dun tu Megbebaya' su Kaunutan si Isus. ²⁴ Bena' misuunan nu nga getaw pu' nda' na dia si Isus dakus su nga sakupen, suminakay dailan dema di nga sekayan kia, pangay ilan ditu Capernaum, penengaun nilan si Isus.

Si Isus su Gaan Mekegbegay Ketubu' nda'i Tamanen

²⁵ Naa bena' mibaangan nu nga getaw si Isus ditug dipag linaw, sinaak nilan diniin, “Sir, nanuun ka minateng dini?”

²⁶ Kali' sembag si Isus, “Taman talu'u diniu, kana' iini menengaw amu dun dinaan pu' saba' nu kesabut niu tu tu'us pinggulaulau. Segaga, iin sungkini menengaw amu dun, pu' saba' nu kepa'aaan ku diniu kalabung nu pan, mibesug amu dun gela'. ²⁷ Naa ndi' namu penamal meksukat gaan mekpetubu' dig lawas niu, pu' kiin, duuni gikteben. Subay penamal amu sukat gaan megbegay ketubu' nda'i tamanen. Iin su gaan begayu diniu, pu' pinita' na nu Gama'u Megbebaya' pu' bigayanu niin pegbaya'u, naan kini, kig Bata' nu Kilawan.”

²⁸ Kali' ilan saak diniin, “Kenduta' mai kedunut nami tu mauya'an nu Megbebaya'?”

²⁹ Kali' sembag si Isus, “Iini mauya'an nu Megbebaya' baalen niu, petuuden niu ki sinugu'en medini niu.”

³⁰ Kali' ilan pektalu', “Naa sa' ma'antu, paita' mu dinamii mekesalebu' tu'us, adun metuudan ami dun. Ta' alandun mai penggulaulaan mu? ³¹ Sa' pinenggi' maa' nu ginaan nu ginepu'ay ta diag limawa', su gaan genat tug langit, pu' sinulat dengantu, ‘Bigay ni Moises dinilan gaan genat tug langit.’ ”

³² Kali' pektalu' si Isus, “Taman talu'u diniu, kana' ni Moisesi migbegay diniu gaan genat tug langit, su laak Gama'u. Muka' nemun kini, begay diniu nu Gama'u ki tantu gaan genat tug langit. ³³ Pu' su gaan begay nu Megbebaya', lumusad genat tug langit. Ki gaan kini, iin su megbegay tu tiba'an getaw ketubu' nda'i tamanen.”

³⁴ “Sir,” laung nilan, “sa' megdadi, begayay mu ami lelayun di gaan kiin.”

³⁵ Kali' pektalu' si Isus, “Naani gaan kini, pu' megbegayu tu tiba'an getaw ketubu' nda'i tamanen. Adin su getaw mekpaingabang dinaan, ndi' na puli' megutem. Adin su metuudan dinaan, ndi' na puli' kuaun.”

³⁶ “Naa,” laung padun ni Isus, “iini tinalu'u diniau pu' minita' niau laak nda' niau petuuday. ³⁷ Pia na. Adin su tindu' nu Gama'u sumakup dinaan, mekpaingabang dinaan, muka' lumbus, penemba'en ku. ³⁸ Pu' nda'u lusad genat tug langit adun petuuden ku sug danaan delendeman. Segaga iini luminusadu dun, petuuden ku su mauya'an nu suminugu' dinaan. ³⁹ Iini mauya'an nu sumingu' dinaan, ndi'u mbeleng su nga sakup bigayen dinaan, pia sala tawan dinilan. Dayun sa' sungu melengkebig benwa, gela'en ku ilan petubu'ay puli'. ⁴⁰ Pu' iin pa pagidi mauya'an nu Gama'u, adin su mekailala dinaan kini, kig Bata'en, muka' mekpetuud dinaan, naa mpeduunan ketubu' nda'i tamanen. Muka' sa' sungu melengkebig benwa, petubu'en ku puli'.”

⁴¹ Mendadi su nga getaw Judea dia, mikunlumunlum ilan, pigbeni nilan dun ki tinalu' kia ni Isus, laungen, “Naa, naan laungi gaan kini luminusad genat tug langit.” ⁴² Kali' ilan peksinaakay, “Asa ki getaw kini, kana' bain si Isus, sug bata' laak ni Jose? Mi'ilala ta gupia su mekegulangen. Maumanen ma telu'ay, iin su genat tug langit?”

⁴³ Kali' pelum pektalu' si Isus, “Ndi' amu dega pekunlumunlum ma'niin. ⁴⁴ Nda'i getaw mekesakup dinaan sa' kana' iini egaken nu Gama'u, su suminugu' dinaan. Muka' ki sumakup dinaan, petubu'en ku puli' sa' sungu melengkebig benwa. ⁴⁵ Nda' ba sulat nu nga pimuanan nu Megbebaya' dengantu, laung nilan, ‘Ki tiba'an getaw, petu'unan nu Megbebaya'.’ Naa adin su mektal-enten tu pitu'un nu Gama'u, menemba' dinaan. ⁴⁶ Laak nda'u telu'ay pu' duuni mikaita' tu Gama'u. Naan laaki mikaita' tu Megbebaya', pu' su Megbebaya'i pigenatan ku. ⁴⁷ Taman talu'u diniau, adin su metuudan dinaan, iin laaki mpeduunan ketubu' nda'i tamanen. ⁴⁸ Pu' naani gaan,

pu' megbegayu tu tiba'an getaw ketubu' nda'i tamanen.
⁴⁹ Naa su nga ginepu'ay niu, saanan nilan ditug limawa',
 iin daanig lebungan selemen nilan su gaan pilusad dinilan
 nu Megbebaya'. Laak dagid pia ma'antu, bena' minatengi
 gumul nilan, migela' dailan matay. ⁵⁰ Laini tantu gaan
 lumusad genat tug langit, pu' adin su maan dun, ndi' na
 matay. ⁵¹ Muka' naani gaan luminusad genat tug langit
 megbegay ketubu'. Sa' maan su getaw di gaan kini, iini
 metubu' di nda'i tamanen. Muka' ki gaan begayu, iini
 gunedu, begayu adun metubu'i tiba'an getaw.”†

⁵² Bena' midengeg nu nga getaw Judea dia, miksinualay
 ilan pati', kali' ilan pektalu', “Pekenduta'en dun nu getaw
 kini kepa'aanen dinita tu guneden?”

⁵³ Mendadi diksu' ni Isus su talu'en dinilan, “Taman
 talu'u diniu, sa' ndi' niu aanen su guned nug Bata' nu
 Kilawan, muka' sa' ndi' niu inumen sug dugu'en, naa
 ndi' niu malap su ketubu' nda'i tamanen. ⁵⁴ Naa naan
 kini, kig Bata' nu Kilawan, adin su getaw maan di gunedu
 muka' minum dig dugu'u, iini mpeduma tu ketubu' nda'i
 tamanen. Sa' sungu melengkebig benwa, petubu'en ku
 dadema iin puli'. ⁵⁵ Pu' iini tantu gaan su gunedu, muka'
 kig dugu'ui tantu ginumen, ⁵⁶ kaas adin su getaw maan
 di gunedu muka' minum dig dugu'u, dumangen dini
 naan, muka' naan, diin dau dema niin. ⁵⁷ Suminugu'
 dinaan su Gama'u. Kagina tetubu' iin, metubu' dau dema.
 Ma'antu dadema, adin su maan dinaan, metubu' dadema
 iin. ⁵⁸ Mendadi naan laaki tantu gaan luminusad genat
 tug langit, kana' maa' nu ginaan nu nga ginepu'ay niu, pu'
 minatay dailan. Adin su maan di gaan tantu kini, metubu'
 di nda'i tamanen.”

† 6:51 6:51 Su guneden, piulugan dun ni Isus ki kepatayen gumanti' di kepatay nu nga getaw.

⁵⁹ Tinalu' ia ni Isus sinegayen mekpetu'un dia simbaan nu getaw Judea ditu Capernaum.

Su Talu' Mekegbegay Ketubu' nda'i Tamanen

⁶⁰ Bena' midengeg nu nga sakup ni Isusi tinalu'en kia, melaun dinilani miktalu', "Ndi' ta muitani tinalu'en kini. Ta' mai mekesangu' dun ini?"

⁶¹ Mendadi, kini si Isus, misuunanen su kegbensi nu nga sakupen kia pia nda' pesuun dun. Kali' pektalu' dinilan, "Mauya'an ba niu mundang amu saba' nu tinalu'u kia? ⁶² Sa' maita' niu kig Bata' nu Kilawan, naan kini, luntuu puli' ditu pigenatan ku, melegenan pa bamu gusay? ⁶³ Kana' nu pegbaya' nu getaw megbegay ketubu' tu getaw, su laak Balakat nu Megbebaya'. Naa, ki tinalu'u kini, iini meguit diniu Balakat nu Megbebaya' megbegay ketubu'. ⁶⁴ Laak duun diniui ndi' metuudan dinaan." (Kaas ma'niai tinalu' ni Isus, pu' genat tu puunanen, misuunanen su nga ndi' metuudan dun, muka' misuunanen dadema ki tumipu diniin.) ⁶⁵ Kali' padun pektalu' si Isus di nga sakupen kia, "Kaas ma'niai tinalu'u diniu, pu' nda'i mekenemba' dinaan, subay pedelendem dun nu Gama'u."

⁶⁶ Mendadi genat tu ketalu'en dun kia, melaun sakup ni Isus tumiliud diniin, nda' nailan dunut diniin. ⁶⁷ Sa' ma'nia, suminaak si Isus tu sepulu' bu' dua' tawan peneliganen, laungen, "Mendadi yamu, tuliud damu dema dinaan?"

⁶⁸ Sumimbag si Simon Pedro, "Uu Kaunutan, sa' tuliud ami dini'a, taway dun bai pegengagan nami? Sug dani'a talu' laaki mekegbegay tu ketubu' nda'i tamanen. ⁶⁹ Muka' mituudan ami gupia dini'a, suunan nami pu' ya'a na gupia su Pimili' nu Megbebaya'."

⁷⁰ Kali' sembag si Isus, "Naa kana' ba metuud, pimili'u amu nu sepulu' bu' dua' tawan? Dayun sala tawan diniu, menulay!" ⁷¹ Ki tinalu' kini ni Isus, pilebu'anen dun si

Judas, kig bata' ni Simon Iscariote kiin. Pu' pia sala tawan si Judas di nga sepulu' bu' dua' tawan peneliganen, iini tumipu pa dini Isus.

7

Si Isus muka' su nga Pateden

¹ Genat itu, mipanaw si Isus dia laak benwa Galilea. Nda' peditu Judea, pu' su nga kaunutan nu getaw Judea ditu, mekpatay ilan sia diniin. ² Mendadi, sungu na mektelipuun sug lumpuk nu nga getaw Judea piningalan dun sug Lumpuk ngag Bebelayan. ³ Kali' pektalu' dini Isus su nga pateden, “Tumu' awa'a dini, dituun ka Judea, adun maita' nu nga sakup mu ditu ki penggulaulaan mu. ⁴ Pu' su getaw sa' mekpededengeg, ndi'en egluden su penggulaulaanen. Ki nga penggulaulaan mu kini, subay pedayag mu tu tiba'an getaw!” ⁵ (lini tinalu' dun nu nga patedeni ma'nia, pu' pia ilan, nda' ilan pekpetuud diniin.)

⁶ Kali' pektalu' si Isus, “Paa, naan, nda' pa dateng ki gendawu. Yamu, pia ta' endaway dun, megdadi da. ⁷ Ndi' amu mesengay nu nga kilawan, dagid naan, misengayu nilan, pu' penluksaden ku dinilan melaatig betad nilan. ⁸ Mendadi, yamu nai peditug lumpuk. Naan, ndi'u meditu, pu' nda' pa dateng ki gendawu.” ⁹ Sa' ma'niai tinalu'en, mibilin dia Galilea si Isus.

Su Kangay ni Isus tug Lumpuk ngag Bebelayan

¹⁰ Mendadi bena' miditug lumpuk su nga pated ni Isus muka' duuni santa' gebii, miditu dadema si Isus, laak dagid nda' pailagilag dia. ¹¹ Naa ki nga kaunutan nu getaw Judea, pekpenengaun nilan si Isus diag lumpuk, sinaak nilan tu nga getaw, “Adin main?”

¹² Su nga melaun getaw suminaup, miglelekemeday ilan pati' mekatag dini Isus. Duuni miktalu', “Gempia

getaw iin,” duun dademai miktalu', “Kana' ma da, peglimbunganen su nga getaw.” ¹³ Laak pigbuni nilan su telu'en nilan kia, pu' mindek ilan tu nga kaunutan nu getaw Judea.

¹⁴ Mendadi bena' miginenga' na saan sug lumpuk, miditu si Isus Balay Pengedapan tu Megbebaya', piktunananen su nga getaw dia. ¹⁵ Ki nga kaunutan nu getaw Judea, misebu'an ilan dun, kali' ilan peksinaakay, “Paa, ki getaw kini, pikendun ma dun metaasi sinuunanen, asa nda' ma petu'unay di Palinta ta?”

¹⁶ Mendadi kali' pektalu' si Isus, “Ki tinitulu'u kini, kana' danaan delendeman, segaga danu suminugu' dinaan. ¹⁷ Adin su getaw delendemanen penggulaulaanen su mauya'an nu Megbebaya', mesuunanen sa' ta'i pigenatan nu titulu'u, sa' genat ba tu Megbebaya', sa' mikpuun bain tug danaan laak pegbaya'. ¹⁸ Adin su mekpetu'un puun dig daniin laak pegbaya', mekpenalenal da, laak dagid adin su mekpetu'un adun peglelepenenig dengegan nu Megbebaya', su suminugu' diniin, iini tantu mekpetu'un, kana' belusen. ¹⁹ Ma'niin ni Moises, bigayanen amu Palinta nu Megbebaya' dengantu, laak dagid, nda'iduni getaw diniu dinunutanen gela' su Palinta kia. Pu' sa' sia duun diniui getaw dinunutanen gela' su Palinta, mauma dema naan, petain ma niau sia, asa duuni pinalinta ni Moises, ndi' mekpatay?”

²⁰ Kali' sembag su melaun getaw, “Pingepu'an ka menu-lay! Pia nda'i miksaad matay dini'a.”

²¹ Kali' padun sembag si Isus dinilan, “Naa, mainsan pinggulaulau mekesalebu', mitekawan amu dun, launan niu. ²² Bentayay pa daan niu. Pinalinta diniu ni Moises pentu'usan niuig bata' niu pu' getaw Judea nailan, kaas megbaal amu tu'us, pia di Gendaw Pelali (laak kana'

ni Moisesi pigenatanen, su laak nga ginepu'ay niu).^{*}
²³ Naa, sa' sirkunsisuuni getaw di Gendaw Pelali, pu' adun medunutani palinta ni Moises, ta' mai mangit amu dun dinaan sa' pineguli'an ku gupiaig lawas nu getaw kiin di Gendaw Pelali? ²⁴ Mendadi, ndi' amu pegdedali' mengukum di minita' niu, subay unaan pa niu pegdelendem sa' gempia ba su pinggulaula, sa' melaaten ba.”

Si Isus ba su Tindu' nu Megbebaya' Meglekaunutan?

²⁵ Naa duuni nga getaw Jerusalem miktalu', “Ki getaw kini, kana' bain su petain sia nu nga kaunutan? ²⁶ Laak bentayay pa daan niu, megyaga iin di gedapan, laak ndi' nilan pemaagen! Aa, mabu' misuunan ba nilan pu' iinen tu'u su Tindu' nu Megbebaya' Meglekaunutan? ²⁷ Dagitid sa' mateng daw su Tindu' nu Megbebaya', nda' daw mekesuun dun ki pegenatanen. Naa kig launan ta kini, misuunan ta su pigenatan nu getaw kini.”

²⁸ Mendadi, selian ni Isus mekpetu'un dia Penedapan tu Megbebaya', minekeg mektalu', laungen, “Naa, laung niu dun pu' mi'ilala ba niau muka' misuunan ba niui pigenatan ku? Kana' danaan delendeman su kediniin ku. Metuud, duuni Megbebaya' muka' iini suminugu' dinaan, laak iin, kana' niu mailala. ²⁹ Dagitid naan, mikesuunu diniin, pu' iini pigenatan ku, muka' iini suminugu' dinaan medini.”

³⁰ Mendadi ki nga kaunutan kia, sikna midengeg nilan, daapen nilan sia si Isus, laak nda'i mekedaap dun, pu' nda' pa dateng ki gendawen. ³¹ Laak melaun getaw dia, mituudan ilan dini Isus, laung nilan, “Sa' metua' su Tindu'

* 7:22 7:22 Ki tu'us kini, iin sug betad nu nga getaw Judea peksirkunsisu, tinitulu' nu Megbebaya' su gembata' laki, sa' walu endaw genat di kegetawen, tebia' tuli'en, pu' guluganen, gindan pu' getaw Judea, sa'itada getaw mektamuy tu Megbebaya'.

nu Megbebaya' Meglekaunutan, melaun pai mekesalebu' penggulaulaanen, sabaya' nu getaw kini?"

Su Keksugu' Daapen sia si Isus

³² Naa ki nga Pariseo, midengeg nilan su kaunlumunlum kia nu nga melaun getaw mekatag dini Isus. Sa' ma'nia, ilan kia muka' su nga kaunutan nug belian nu getaw Judea, sinugu' nilan dayuni nga megingat tu Penedapan tu Megbebaya', adun daapen nilan si Isus. ³³ Kali' pektalu' si Isus, "Dumuma pau diniu ndi' maiben, dayun megawa'u dini, mpuli'u ditu suminugu' dinaan. ³⁴ Dayun penengaun niau, laak ndi' niau mbaangan, pu' ndi' amu mekeditu pegengayan ku."

³⁵ Naa ki nga kaunutan nu getaw Judea kia, miksinaakay ilan dayun, laung nilan, "Adin ma saan angayi getaw kini, ndi' ta mbaangan? Mabu' mangay ditu ngag duma ta misigwag, su luminamug tu nga getaw Grecia, pu' adun petu'unanen pelum su nga getaw Grecia? ³⁶ Ta' mai guluganen ki tinalu'en kia pu' penengaun ta, laak ndi' tain mbaangan, pu' ndi' ita mekeditu daw pegengayanen?"

Su Tubig Mekegbegay Ketubu' nda'i Tamanen

³⁷ Naa bena' sug deksu'an nug Lumpuk nug Liniusan, si Isus, migindeg di gedapan nug launan getaw, minekeg dayun mektalu' dinilan, "Pia adini getaw kuaun, mekangay minum dini naan. ³⁸ Nda' ba mesulat di Misulat Talu' nu Megbebaya', 'Adin su metuudan dinaan, duuni maa' nu tebud dig dialem ginaanen menelegan megbegay ketubu' nda'i tamanen.' " ³⁹ Naa, ki tinalu' ni Isus kia, iini mekatag di penggulaula nug Balakat nu Megbebaya', su sungu begay tu nga mekpetuud diniin. Nda' pa ia begay, pu' nda' pa lentu si Isus ditu gekbus langit adun maita' nug launan biwat su kelengas nu pegbaya'en.

Su Sumpaki' nug Delendeman nu nga Getaw

⁴⁰ Naa bena' midengeg nu nga melaun getaw ki tinalu' kia ni Isus, duuni miktalu', "Ki getaw kini, iinen na tu'u su pedetengen ta Pimuunan nu Megbebaya!"

⁴¹ Sa' sug dumai mektalu', laung nilan, "Iinen na tu'u su Tindu' nu Megbebaya' Meglekaunutan!"

Dagid duun pa pagidi mektalu', "Su Tindu' nu Megbebaya' Meglekaunutan, kana' ma genat tu Galilea! ⁴² Iini sinulat ditu Misulat Talu' nu Megbebaya', su Tindu' nu Megbebaya' Meglekaunutan, sapu' ni Adi' David, kaas genat dig Betlehem, sug lunsud ni David." ⁴³ Iin dayuni sumpaki' nug delendeman nu nga getaw mekatag dini Isus. ⁴⁴ Sug дума, mauya'an nilan sia daapen iin, laak nda' pai kedaap diniin.

Su Kemilas nu nga Kaunutan nu Getaw Judea

⁴⁵ Naa su nga megingat tu Penedapan kiin, bena' mipuli' ilan ditu nga kaunutan nug belian muka' tu nga Pariseo kia, sinaakan ilan, "Naa, mauma dema nda' ma niu iin uitay?"

⁴⁶ Kali' sembag su nga megingat, "Pu' iin pa duuni getaw mikelu'ay maa' nu getaw kiin!"

⁴⁷ "Apelai!" sinaak nu nga Pariseo. "Milimbangan damu niin dema? ⁴⁸ Sa' yami nu nga kaunutan muka' Pariseo, duun bai misuunan niu sala tawan dinami mitu-udan di getaw kiin? ⁴⁹ Baa, nga melaun getaw kini! Nda' nilan mesuunay su Palinta nu Megbebaya' pisulaten dini Moises, kaas inukuman nailan nu Megbebaya!"

⁵⁰ Naa sala tawan di nga Pariseo kia, si Nicodemo, su miditu ni Isus sug diin kiin. Kali' pektalu' si Nicodemo, ⁵¹ "Asa binandu ditu Palinta ta, ukumani getaw subay unaan pa biselaay."

⁵² Kali' sembag su nga Pariseo, "Masi' ya'a, dumaa dadema niin getaw Galilea? Naa, penilung mu su Misulat

Talu' nu Megbebaya'. Mesuunan mu dayun, nda'i pimuu-
nan nu Megbebaya' genat tu Galilea.”⁵³ [Sa' ma'antu,
minuli' su nga kelaun getaw.]

8

Sug Libun Miglaat Peksuunan

¹ [Laak si Isus, miditug Bentud nu nga Gayu Olibo.
² Bena' migendaw puli', milapus mangay ditug Balay
Penedapan tu Megbebaya'. Dekag minateng dia,
mikpungun diniin su melaun getaw. Migingkud dayun
si Isus, piktu'unanen ilan. ³ Naa duunig libun iwit dia
nu nga mekpetu'un di Palinta nu Megbebaya' muka' nu
nga Pariseo. Kig libun kini, duun daw mi kaita' dun,
tebia' miglaat peksuunan. Mendadi, pinindeg nilan
dia gedapan nu nga getaw kig libun kia. ⁴ Laung nu
miguit dun dia, “Sir, kig libun kini, duuni mi kaita' dun
gupia miglaat peksuunan daw. ⁵ Naa, iini palinta nu
Megbebaya' dinita pisulaten dini Moises, subay betuun
ta. Mendadi ya'a, ta' mai ketalu' mu dun?” ⁶ Naa iini
tinalu' nilan duni ma'nia, pu' pengimanan nilan sia si Isus
di metalu'en, adun dengaten nilan sia.

Mendadi si Isus, migdukung, sinulatanen tendu'en sug
lupa'. ⁷ Minamal ilan dayun sumaak diniin. Migindeg
dayun si Isus, kali' pektalu', “Naa, adin diniui nda'i
sala'en, iini meguna megbatu dun.” ⁸ Migdukung puli'
si Isus, dayun peksulat puli' diag lupa'. ⁹ Mendadi ki
nga getaw kia, mimegawa' ilan dayun dia, piksesala
tawan dinilan mipanaw, miguna su nga megulang dinilan.
Tiga'wan, iin laaki mibilin dia si Isus, dumanen laak sug
libun pegindeg pa dia. ¹⁰ Mendadi, migindeg puli' si Isus,
kali' saak tug libun, “Ibun, adin mailan? Nda' bai mbilin
mukum dini'a?”

¹¹ Kali' sembag, “Sir, nda'idun.”

“Mendadi naan,” laung ni Isus, “ndi' dau dema mukum dini'a. Uli'a na, muka' ndi'a puli' pegbaal sala'.”]

Si Isus su Tiag nu Tiba'an Getaw

¹² Naa, mikpetu'un puli' si Isus tu nga getaw. Kali' pektalu', “Naa, pektalentenay niu ini. Naani Tiag mekpedelag di tiba'an getaw. Adin su getaw dumunut dinaan, iini medelagan nu Tiag, su puun nu ketubu' nda'i tamanen, muka' iin, ndi' na mekepanaw di medelem.”

¹³ Kali' pektalu' su nga Pariseo, “Naa, ta' mai metuudan ami dun, pu' ya'a laaki tuminakesi' dun? Su takesi' mu, nda'i gatagen.”

¹⁴ Kali' sembag si Isus, “Pia naan laaki miketakesi' dig lawasu, laak metuudi tinakesi'an ku, pu' misuunan kui pigenatan ku muka' peguli'an ku, laak yamu, nda' niu mesuunay ia. ¹⁵ Sa' mukum amu, su kinilawan dai pigunut niu. Naan, ndi'u mukum di kilawan. ¹⁶ Laak sa' pinenggi' pu' mukumu di nga getaw, mpiai kaukumu dun, pu' kana'u laak salai mukum dun, pu' dumananu dun nu suminugu' dinaan. ¹⁷ Pektalentenay niu ini, misulat di Palinta niu sinulat ni Moises, sa' dua' tawani meketakesi' dun, mpemilang metuud su takesi'an nilan. ¹⁸ Naa, mitakesi'an kuig lawasu muka' tinakesi'an dau dema nu Gama'u, su suminugu' dinaan.”

¹⁹ Kali' saak su nga Pariseo, “Naa ki gama' mu kini, adin ma dun?”

Kali' sembag si Isus, “Ndi' amu sumambat dinaan, muka' su Gama'u dema, ndi' amu sumambat dun. Sa' sia suminambat amu tantu dinaan, naa suminambat damu dema tantu tu Gama'u.”

²⁰ Kiai tinalu' ni Isus su dia pa Pangedapan tu Meg-bebaya' mekpetu'un dia nga getaw, dia mesempel nug betangan nu nga getaw gamut nilan ditu Pangedapan.

Nda' pai duminaap dini Isus, pu' nda' pa datengi gendaw su tindu' nu Megbebaya' kedaap diniin.

Ndi' amu Mekeditu Pegengayan ku

²¹ Kali' padun pektalu' si Isus tu nga getaw, “Naa mawa'u dini, penengaun niau dayun, laak ndi' niau mbaangan. Kaas matay damu, nda' namu lelaatay di sala' niu. Ndi' amu mekeditu pegengayan ku.”

²² Naa, su nga kaunutan nu getaw Judea, kali' ilan pektalu', “Kagina tinalu'en pu' ndi' ita mekeditu pegengayanen, mabu' iini guluganen, megeget.”

²³ Kali' sembag si Isus, “Yamu, dangen amu dinig lubang. Naan, genatu tu gekbus langit, kaas sakup amu laak nu kekinilawan. Laak naan, kana'u sakup kekinilawan.

²⁴ Kiai tinalu'u dun pu' matay damu nda' namu lelaatay di nga sala' niu. Matay amu tu'u nda' amu lelaatay, subay metuudan amu dun naan su pektelu'en ku kini.”

²⁵ Kali' ilan saak, “Adin ka getaw?”

Simbag dayun ni Isus, “Naa genat tu puunanen, naani pektelu'en ku diniu. ²⁶ Yamu kiin, melaun pa paduni metalu'u mekatag diniu, laak ndi'u telu'en. Melaun dademai maukuman ku amu dun, laak ndi'u dadema mukum. Su talu' nu suminugu' dinaan, iin su metuud muka' iin laaki ukiten ku di tiba'an getaw.”

²⁷ Naa su nga mikedengeg tu tinalu'en kia, nda' nilan mesabut pu' su pektelu'enen dinilan, iin su Gama'en Megbebaya'. ²⁸ Ma'antu, kali' dayun pektalu' si Isus, “Naanig Bata' nu Kilawan. Sa' inaten na niau, mesuunan na niu pu' naan su pektelu'en ku kiin. Muka' dema mesuunan niu dayun nda'i penggulaulaan ku mikpuun tug danaan pegbaya', pu' telu'en ku su laak pisuun dinaan nu Gama'u. ²⁹ Iin su suminugu' dinaan, megduma lelayun

dinaan muka' nda'u niin petuyangay salau, pu' pinemalan ku lelayun penggulaulaay su mauya'anen.”

³⁰ Mendadi melauni nga mikedengeg tu tinalu' kia ni Isus, mituudan ilan diniin.

Su Getaw Mekpetuud, iini Megawen

³¹ Mendadi, kali' pektalu' si Isus tu nga getaw Judea dia mikpetuud na diniin, “Sa' penemalan niu dunutay su telu'en ku, naa sakupu namu tantu. ³² Mesuunan pa niu dayuni metuud muka' pebeluyen amu nu metuud.”

³³ Su nga getaw Judea, kali' ilan pektalu', “Mauma dema telu'en mu pu' pebeluyen ami, asa sapu' ami ni Abraham, nda' nami mainsan mbianayi gulipen di getaw. Ta' mai pengma'anan mu pebeluyen ami?”

³⁴ Kali' sembag si Isus, “Naa, taman talu'u diniu, adin su mikesala', malap gulipen nu sala'en. ³⁵ Sa' upama gulipen, kana' sakup lelayun nu mingulipen dun, laak dagid sug bata' nu mikpaulipen dun, danilan da lelayun. ³⁶ Kaas sa' iini mekpebeluy diniu sug Bata' nu Megbebaya', naa mbeluy damu gupia. ³⁷ Naa, misuunan ku pu' yamui sapu' ni Abraham, laak pia ma'antu, mauya'an niu petain niau, pu' nda' pengganget dig delendeman niu su pektelu'en ku. ³⁸ Naan, piktu'un ku diniu su pinita' dinaan nu Gama'u. Yamu dema, penggulaulaan niu su midengeg niu dig daniu gama'.”

³⁹ Sumimbag ilan, “Sapu' ami ni Abraham.”

“Sa' upama sapu' amu ni Abraham, penunggilingan niu sia su pinggulaula ni Abraham, ⁴⁰ laak dagid iini penggulaulaan niu sia, petain niau. Naa, nda'i pinggulaula ni Abraham ma'nia. Daal dai pinggulaulau, inukitu diniu su midengegu metuud tinalu' nu Megbebaya'. ⁴¹ Yamu, iini pinunggilingan niu, su pinggulaula nu tantu gama' niu.”

“Salabuuk dai gama' nami, su da laak Megbebaya'. Bata' ami niin tantu.”

⁴² “Kana', pu' sa' iini tantu Gama' niu, petailen niau sia, pu' iini pigenatan ku su Megbebaya', muka' kini dau. Kana' laak puun tu pegbaya'u su kediniin ku, pu' iini suminugu' dinaan su Megbebaya'. ⁴³ Mauma dema nda' niu mesabuti talu'u? Iini pikpuunanen, ndi' niu muit su pektelu'en ku. ⁴⁴ Mingema'an damu gusay tu gama' niu, su Palin. Iin laaki mauya'an niu pektalentenay, su mauya'an nu Palin. Su Palin, genat tu pikpuunanen, memunu'an iin muka' belusen, pu' nda' na daan pegilengig delendemenan tu metuud, pia maika'. Sa' megbalus, bantangen da, pu' belusen, muka' iin demai pigenatan nug balus. ⁴⁵ Kaas, iini ndi' amu metuudan dun dinaan, pu' telu'en ku su metuud. ⁴⁶ Nda'idun diniui mekeglegintuud dun pu' naani mikesala'. Sa' piglegintuudu su kekesuun, mauma dema nda' amu metuuday dun? ⁴⁷ Pektalentenay niu ini, adin su tantu sakup nu Megbebaya', iini mekineeg tu talu' nu Megbebaya', laak ndi' niu pektalentenay, pu' kana' amu daniin pigegetawan.”

Miguna pa si Isus dini Abraham

⁴⁸ Mendadi ki nga getaw Judea kia, kali' ilan saak dini Isus, “Ndi' ba metuud, ya'a su pektelu'en nami getaw Samaria, su pingepu'an menulay?”

⁴⁹ Kali' sembag si Isus, “Nda'u lai pengepu'ay menulay. Adin su pinggulaulau, mekpebasau dun tu Gama'u, laak yamu, piksudi'an niau. ⁵⁰ Nda'u pegelapayi megdedengegu dun, laak dagid duuni mekpededengeg dun dinaan, pu' iini metau mukum. ⁵¹ Naa, taman talu'u diniu, adin su mekpetuud tu tinalu'u, ndi' na matay.”

⁵² Kali' ilan talu' diniin, “Nandaw, mitekad na nami tantu pingepu'an ka tu'u menulay! Pu' si Abraham muka' su nga pimuunan nu Megbebaya' dengantu, minatay da.

Dayun pelum iini telu'en mu, su mekpetuud di tinalu' mu, nda' nai petayanen. ⁵³ Su ginepu'ay ta si Abraham, minatay da. Masi' metaasa pa ba diniin? Su nga pimuanan nu Megbebaya' dengantu, minatay dadema. Tai' delendeman mu dun, adin ka getaw?"

⁵⁴ Laung ni Isus, "Sa' naani migalap dun sug dengegan ku, nda'i gatagen. Laak iini migbegay dun dinaan su Gama'u, iin su tinalu' niu pektemuyen niu. ⁵⁵ Laak dagid sampay nemun, nda' niu iin sembatay. Naan, suminambatu gupia diniin. Sa' pinenggi' gelalen ku nda'u sembatay, naa, belusenu ma'niin diniu, pu' suminambatu gupia diniin, muka' piktalentedan ku su telu'enen. ⁵⁶ Naa si Abraham kiin, su gama' niu laung, pigleliag, pu' mikpedateng di ketua'u dini. Naa minita'en na, muka' liliag na gupia."

⁵⁷ "Kenduta' mai kaita' mu dini Abraham, asa nda' pa peglima pulu'i taun mu?"

⁵⁸ "Taman talu'u diniu, su nda' pa pegigetaw si Abraham, naan, daan nau."

⁵⁹ Mingimud dayun batu su nga kaunutan kia, pu' betuun nilan sia si Isus adun matay. Laak dagid si Isus, luminamug tu tebenan getaw, migawa' dayun dia Penedapan tu Megbebaya'.

9

Piuli'an ni Isusig Buta

¹ Mendadi selian ni Isus mekpanaw, duuni mipekita'en buta, mibuta sikna mbata'en. ² Sinaak nu nga sakup ni Isus, "Sir, ta' mai mikesala' di ma'nia kia, migigetaw, daan ma na buta? Iin, atawaka su nga mekegulangan?"

³ Kali' sembag si Isus, "Kana' iini mikesaba' dun butai kegigetawen, puun di sala'en, sampay sala' nu mekegulangan. Ki getaw kini, migigetaw dun buta, adun mpaita'

nu Megbebaya' su ginuungen pebian di penggulaulaanen diniin. ⁴ Naa selian gendaw pa, subay penggulaulaan ta su pipenggulaula dinita nu suminugu' dinaan. Pu' ndi maiben, meglegebie na, dayun nda'idun nai mekenggulaula dun. ⁵ Selian ku dinig lumbang, naani tiag tu tiba'an getaw.”

⁶ Selian ni Isus mektalu', migdula' dig lupa', binasa'en dun sug lawayen. Inugidanen dun dayun ki mata nug buta kia, ⁷ dunut miktalu' diniin, “Naa, angaya tug Bulenaw Siloe, pengulamusa ditu.” (Su gulugan nu ngalan kia Siloe, “Sinugu’.”) Mipanaw dayun kig buta kia diag bulenaw, mingulamus, dayun mipuli', mikengita' na.

⁸ Naa su nga sumbalay nug buta kia kampu' nu getaw mikaita' diniin mekpenengi limus, sinaak nilan, “Kana' ba iinen ini su pegingkudingkud mekpenengi limus?”

⁹ Simbag nu ngag duma, “Iin main.” Laak laung nug duma getaw, “Kana'en, ganggiden laak.”

Kali' dayun pektalu' ki miuli'an kia, “Naa la' lai.”

¹⁰ “Naa sa' ma'antu,” sinaak nilan, “ta' mai mikengita'a dun nandaw?”

¹¹ Kali' sembag, “Ki getaw pegingelanan si Isus, migbasa' lupa', binasa'en dun lawayen, inugiden dayun di matau. Tinalu'en dayun dinaan mangayu ditug Bulenaw Siloe, mengulamusu. Minangayu dayun mengulamus, iin dayuni kengita'u.”

¹² Sinaak nilan, “Naa ki getaw kiin, adin ma dun?”

Kali' sembag su minayan buta, “Ta' dun.”

Sinaakan nu nga Pariseo su Miuli'an Buta

¹³ Naa ki minayan buta kia, iwit nu getaw tu gedapan nu nga Pariseo. ¹⁴ Naa su kegbasa' ni Isus lupa' muka' kepauli'ayen tug buta kia, mitaang di Gendaw Pelali.

¹⁵ Mendadi, sinaakan pelum nu nga Pariseo ki getaw kia,

sa' ta'ig bian nu kengita'en. Kali' sembag, “Ki getaw kiin, inugidanen ki matau basak. Bena' mingulamusu, mikengita' nau dayun.”

¹⁶ Naa ki nga Pariseo kini, kali' pektalu' sug дума, “Ki getaw kiin mineguli' dun, kana' genat tu Megbebaya', pu' ndi'en pektalantenani Gendaw Pelali.”

Laak sug дума pelum, laung nilan, “Naa sa' pinenggi' mikesala' tu'ui getaw kiin, mekenduta' bai kenggulaulanen di nga mekesalebu' kia?” Sa' ma'nia, miksumpaki' ilan dun.

¹⁷ Naa sa' ma'nia, sinaakan puli' nu nga Pariseo su miuli'an kia, laung nilan, “Kagina ya'ai pipengita' nu getaw kitu, ta' mai ketalu' mu mekatag diniin?”

Kali' sembag, “Mituudanu dun pu' pimuunan iin nu Megbebaya'.”

¹⁸ Naa ki nga kaunutan nu nga getaw Judea kini, beknanen, nda' ilan metuuday dun pu' ki getaw kia, daan buta, dayun mikengita' na. Sa' ma'nia, pinsabi nilan su nga mekegulangan, ¹⁹ suminaak ilan dayun dinilan, “Bata' niu maini? Naa, pektelu'en niu mibuta sikna mbata'en. Sa' ma'antu, ta' mai mikengita' dun ia nandaw?”

²⁰ Kali' sembag su nga mekegulangan, “Kini, misuunan nami pu' bata' nami tantu, muka' misuunan nami, daan buta iin sikna mbata'en. ²¹ Laak tumu' nda' nami suunay sa' ta' mai mikengita' dun nandaw, muka' nda' nami dadema suunay sa' ta' taway duni mineguli' dun. Tumu' iin nai saakay niu, gembagel nain, metau na sumbag!” ²² Kaas ma'niai simbag dun nu nga mekegulangan, pu' mindek ilan di nga kaunutan kia. Pu' duuni sabut nu nga kaunutan, adin su meglegintuud dun pu' si Isus su Tindu' nu Megbebaya' Meglekaunutan, subay utidan di simbaan nu getaw Judea. ²³ Kaas ma'niai mitalu' dun nu

nga mekegulangen, laung nilan, “Gembagel ma na, iini saakay niu!”

²⁴ Mendadi, kedua' deksu' na sebiay ki minayan buta kini. Kali' ilan pektalu' diniin, “Naa sapaa tu gedapan nu Megbebaya' pu' telu'en mui metuud! Ki getaw kiin, suunan nami pu' mikesala' getaw iin.”

²⁵ “Ta' dun,” simbagen, “sa' mikesala' bain, sa' kana'. Iin laaki misuunan ku, butau, dagid nandaw, mekengita' nau.”

²⁶ Sinaak nilan diniin, “Ta' maig binaalen dini'a? Pik-enduta'en ma kauli'ayi mata mu?”

²⁷ Kali' sembag, “Naa, daan ku na tinalu' diniu, laak nda' niu pekineegay. Naa mauma dema mauya'an ma niu medengeg niu puli'? Mauya'an niu ba, sumakup damu dema diniin?”

²⁸ Pinampalaksan nilan dayun kig buta kia, laung nilan, “Paa, ya'a kiin, sakupa niin. Yami, sakup mami ni Moises. ²⁹ Naa si Moises, misuunan nami pu' ginukitan tu'u iin nu Megbebaya'. Laak ki getaw kiin, nda' nami suunay sa' adini pigenatanen!”

³⁰ Kali' pektalu' su miuli'an buta, “Misebu'anu gupia diniu! Nda' niu suunay sa' adini pigenatanen, asa pi-uli'aneni matau! ³¹ Suunan ta pu' su nga mekesesala' getaw, ndi' penemba'en nu Megbebaya' su kenengi nilan. Penemba'en laak nu Megbebaya' su kenengi nu megbasa gupia diniin muka' menggulaula tu mauya'anen. ³² Pu' genat pa dengantu, iin pa pegdedengeg duuni meneguli' dig buta, mibuta sikna mbata'en. ³³ Naa sa' kana' genat tu Megbebaya' ki getaw kiin, nda'en sia mpenggulaula.”

³⁴ “Apelai, ya'a kiin,” simbag nilan. “Genat tu kaika'ay mu, mekesesala'a getaw. Dayun ya'a bai mekpetu'un dinami?” Dayun nilan pua'ay tu simbaan nilan su miuli'an buta.

Pinengaw ni Isus su Piawa' di Simbaan

³⁵ Mendadi si Isus, bena' midengegen pu' ki piuli'anen kia, piawa' tu simbaan nu getaw Judea, pinengawen. Bena' mibaanganen, sinaaken diniin, “Mikpetuuda ma dig Bata' nu Kilawan?”

³⁶ Kali' sembag su miuli'an kia, “Naa sa' mesu'at, Sir, pesuun mu dinaan sa' ta' taway dun iin, adun mekpetuudu diniin!”

³⁷ “Minita' mu na,” simbag ni Isus. “Iinig duma mu megabitabit.”

³⁸ “Sir,” laungen, “mekpetuudu!” Minginlulud dayun di gedapan ni Isus.

³⁹ Kali' pektalu' si Isus, “Iini luminusadu dun dinig lumbang, pu' adun pekpainen ku ki ngag buta muka' ki nga getaw mangken pu' mekengita' ilan daw. Mekengita' dayun sug buta kia, muka' buta na sug laung nilan dun mekengita'.”*

⁴⁰ Dekag midengeg nu nga Pariseo pegindeg dia, sinaak nilan dini Isus, “Ta'i ketalu' mu dun? Yami, buta bami dema?”

⁴¹ Kali' sembag si Isus, “Sa' upama buta amu tantu, naa nda'i sala' niu. Dagit kagina engkenen niu pu' mekengita' amu, gempantek, mikesala' amu.”

10

Su Sambingay mekatag di Megingat tu Karniru

¹ Kali' pektalu' si Isus, “Taman talu'u diniu, pinenggi' duuni galad melauni karniru dun. Naa, adin su ndi' mian di genga'an sa' suled, laak mengkalemikit tug labat, iini megdaaw muka' tulisan. ² Laak dagid adin su mian tu

* ^{9:39} ^{9:39} Su ngag buta, piulugan dun ni Isus su getaw mangken pu' kulangi sinuunan nilan mekatag di metuud. Su nga laung nilan dun mekengita' ilan, iin su laung nilan dun migela' na nilan metekad su metuud.

genga'an sa' suled, iin su tantu megingat tu karniru. ³ Iin, sa' mateng tu galad, puka'an nu megingat tu genga'an. Sa' suled, medengeg dayun nu nga karniru su tingegen. Tuanen su ngag daniin karniru, piksesalabuuk ingelananen ilan, muka' egakenen ilan mangay ditug liu. ⁴ Bena' megela'en ilan uitay ditug liu, meguna dinilan mpanaw. Dunutan nilan iin gupia, pu' mailala nilan su tingegen. ⁵ Ndi' ilan dumunut tug lain getaw, segaga menggebek ilan, pu' ndi' nilan mailalai tingeg nug lain getaw.”

⁶ Naa iini sinambingay ni Isus tu nga kaunutan nu getaw Judea, laak nda' nilan mesabuti guluganen.

Si Isusi Metau Megingat

⁷ Mendadi, laung dayun ni Isus, “Taman talu'u diniu, naani genga'an bianan nu nga karniru sa' suled. ⁸ Sug launan getaw miuna dinaan, tautau pegwekilan ilan nu Megbebaya', ilani megdaaw muka' tulisan, laak nda' ilan pekineegay nu nga karniru. ⁹ Naani genga'an, adin su mian di genga'an kini sa' suled, iini megawen. Suled dayun muka' luyu meksukat meseksaben. ¹⁰ Naa sa' pinenggi' su megdaaw, metua' adun laak megdaaw muka' mekpatay sampay menggeba'. Iini midiniinu dun pu' adun mpeduunan su sumakup dinaan ketubu' nda'i tamanen, su ketubu' nda' dademai taman nu kelengasen.”

¹¹ Laung pa ni Isus, “Naani gempia megingat tu nga karniru. Naa, su gempia megingat tu nga karniru, iin su miuya' gumanti' di kepetayan nilan. ¹² Laak dagid su tinindanan, su kana' megingat tantu, sa' maita'en mesebangi mendapa' tu karniru, gubek, belenganen su nga karniru, pu' kana' maini gapu'en. Dumapa' dayun su mendapa' tu karniru muka' mpelak su ngag duma. ¹³ Gubek su tinindanan, pu' tinindanan laak muka' ndi'

melelaat tu nga karniru. ¹⁴ Laak naan su gempia megingat. Suminambatu tug danaan karniru muka' suminambat ilan dinaan, ¹⁵ maa' nu kesambat nu Gama'u dinaan sampay su kesambatu diniin. Miuya' nau gumanti' dadema di kepatay nu nga karniruu. ¹⁶ Naa duun pai ngag lain karniruu kana' pa di sekauluan kini. Subay engain ku ilan dema. Mektalente ilan di tingegu, mbaluy ilan pa pagid sekauluan, sala tawan dai megingat dun.

¹⁷ “Ini pegbesaanu dun nu Gama'u, begayu matayig lawasu, pu' metubu'u puli'. ¹⁸ Pia ta' taway dun, nda'i mekegbaya' mekpatay dinaan, subay begayan ku pegbaya'en mekpatay dinaan. Muka' sa' begayu, danaan da delendeman. Duuni pegbaya'u megbegay dun, muka' duun dademai pegbaya'u metubu'u puli'. Iini sinugu'an dinaan nu Gama'u.”

¹⁹ Naa sikna midengeg nu nga getaw Judea su tinalu' kia ni Isus, miksumpaki' puli'ig delendeman nilan. ²⁰ Melaun mektalu', “Pinge'pu'an ma menulay ki getaw kiin! Mibu'ang! Mauma dema pekineegan niu?”

²¹ Laak sug duma, laung nilan, “Sa' pinenggi' pingepu'an menulay, kana' ma'niai telu'enen. Ki menulay, mekeneguli' ba dig buta?”

Pimilas nu nga Getaw Judea si Isus

²² Naa kagina timpu na metegdaw, miktelipuun dia Jerusalem sug lumpuk nu getaw Judea gindan tu Kegugas Balay Pangedapan tu Megbebaya'. ²³ Si Isus, mikpanawpanaw dia Pangedapan, dia silung piningalan dun Silung ni Salomon. ²⁴ Mendadi ki nga getaw Judea, miktabu' ilan diniin, kali' ilan pektalu', “Ta' ma, maiben mu pa pekegelelayig delendeman nami? Peman-tek mu dinami, ya'a ba tu'u su Tindu' nu Megbebaya' Meglekaunutan?”

²⁵ Kali' sembag si Isus, “Mitubusu na talu' diniu, laak nda' amu metuuday dun. Iini miketakesi' gupia dinaan, su pinggulaulau, su pigwakil dinaan nu Gama'u. ²⁶ Laak dagid, ndi' niu petuuden, pu' kana'u amu karniru.* ²⁷ Pu' sa' su nga karniruu, pektalentedan nilan su tingegu. Sum-inambat dau dema dinilan, kaas duminunut ilan dinaan. ²⁸ Begayan ku ilan ketubu' nda'i tamanen, ndi' ilan matay, muka' nda' demai mekagaw dun di gengkeman ku. ²⁹ Su Gama'u migbegay dun dinaan, iin su megbaya' pa dun dig launan. Nda'i mekagaw dun di gengkemanen.” ³⁰ Diksu' ni Isus su talu'en, “Naa, naan muka' su Gama'u, iin da.”

³¹ Bena' midengeg nu nga getaw Judea, mingimud ilan puli' batu, pu' betuun nilan sia si Isus adun matay. ³² Kali' pektalu' si Isus, “Naa, melaun gempia pinita'u diniu di pipenggulaula nu Gama'u dinaan. Ta' mai betuun niau dun?”

³³ Kali' ilan sembag, “Kana' nu gempia pinggulaula mu. Iinig betuun ka nami dun, pu' sudi'an mu su Megbebaya'! Pu' pilepeng mu sug lawas mu tu Megbebaya', asa kilawan ka da!”

³⁴ Laung dayun ni Isus, “Nda' ba mesulat di Palinta niu pu' miktalu' su Megbebaya', ‘Yamui ngag diwata’? ³⁵ Misuunan ta pu' su Misulat Talu' nu Megbebaya', nda'i gikteb nu ketuuden. Muka' su nga getaw kia dengantu pimuunan nu Megbebaya', piningalanen dun ngag diwata. ³⁶ Sa' ma'antu, ndi' niu mpia telu'en pu' piksudi'an ku su Megbebaya' sa' tinalu'u pu' naanig Bata' nu Megbebaya', asa pimili'u niin medinig lumbang. ³⁷ Sa' pinenggi' ndi'u sia penggulaulaan su pibaal dinaan nu Gama'u, naa megdadi ndi' amu metuudan dun. ³⁸ Laak dagid, sa' penggulaulaan ku tu'ui pibaalen dinaan, naa pia ndi' niu

* 10:26 10:26 Su nga karnirunen, piulugan dun ni Isus su nga suminakup diniin.

duateni talu'u, subay petuuden niu su nga penggulaulau. Sa' pema'antuun niu, naa subay metuudan amu dun, naan muka' su Gama'u, iin da tanan.”

³⁹ Mendadi, pikpulingkasan puli' nu nga getaw Judea daapay si Isus, dagid migliaw dinilan.

⁴⁰ Sa' ma'nia, mipuli' si Isus ditug dipag tubig Jordan tanda' pigbunagan ni Juan diniin tubig, migbebenwa pa dia. ⁴¹ Melaun getaw miditu niin, laung nilan, “Si Juan kiin, nda'i mekesalebu' pinggulaulanen. Laak dagid ki kelaun tinalu' ni Juan mekatag di getaw kini, lumbus minuud.” ⁴² Melaun dayun getaw dia mituudan dini Isus.

11

Su Kapatay ni Lazaro

¹ Naa duuni getaw pegladu, ngalanen si Lazaro. Kini si Lazaro, pegbenwa diag Betania, ilan nu nga pateden si Maria muka' si Marta. ² (Si Maria kini, iin su migbunag kiin pagemut tu geksud nu Kaunutan si Isus muka' pinunasen dun kig buuken. Su pateden si Lazaro, iin su migladu kia.) ³ Mendadi, pimuun si Isus nug dua' tawan libun kia mekpated, laung nilan, “Sir, pegladu ki petailen mu sambat si Lazaro.”

⁴ Mendadi kini si Isus, bena' midengegen, kali' pektalu', “Naa, ki kegladu kini ni Lazaro, kana' iinig deksu'anen su petayanen. Iini migladu dun, pu' adun megleepig dengegan nu Megbebaya', muka' adun megleep dadema kig dengegan nug Bata' nu Megbebaya'.”

⁵ Naa si Isus, milelaat gupia dini Marta muka' su pateden kia libun sampay si Lazaro. ⁶ Laak pia ma'antu, bena' misuunanen pu' migladu si Lazaro, milangan pa dua' gebii. ⁷ Bena' mitektakig dua' gebii, laung ni Isus tu nga sakupen, “Mpuli' ita ditu Judea.”

⁸ “Aba, Sir,” simbag nu nga sakupen. “Mpuli'a na pelum ditu, asa begua da betuay sia nu nga getaw Judea dia?”

⁹ Kali' sembag si Isus, “Naa su gendaw, kana' ba sepulu' bu' dua' uras? Naa sa' mpanawi getaw metaang di gendaw, ndi' medapal, pu' maita'en su mekpedelag dig lumbang.* ¹⁰ Laak sa' dagid mengelem, naa medapal, pu' nda'i mekpedelag diniin.” ¹¹ Sa' mideksu'en telu'ay kia, miktalu' padun si Isus, “Naa su sambat ta si Lazaro, tinulug na. Dagid meditu dau niin, adun tenuden ku.”

¹² Kali' sembag su nga sakupen, “Sir, sa' tinulug da, mauli'an da.”

¹³ Naa ki tinalu' ni Isus kia, pingma'ananen dun, minatay si Lazaro. Laak laung dun nu nga sakupen, tulug laaki telu'enen. ¹⁴ Sa' ma'nia, pinluksad ni Isus dinilan, laungen, “Minatay na si Lazaro. ¹⁵ Laak dagid saba' diniu,” maa' laung pa ni Isus, “liliagu dun pu' nda'u ditu, pu' adun sumalig amu dinaan. Naa laawan taitu.”

¹⁶ Mendadi sala tawan dinilan si Tomas (piningalan dun su Gapid), laungen tu nga samasakupen kia, “Naa megdunut daita dema di Mekpetu'un dinita, adun sa' petain, meksaliunung daita diniin!”

Si Isusi Mekpetubu' Puli' tu Getaw muka' iin su Puun nu Ketubu'

¹⁷ Naa bena' minateng si Isus diag Betania, pisuun diniin pu' paat gebii na dig lupa' si Lazaro. ¹⁸ Naa kig lunsud Betania kia, duun saani telu kilumitru laakig layu'en tu Jerusalem. ¹⁹ Sa' ma'nia, melaun getaw Judea miditu ni nga Marta muka' si Maria, adun megbelangbelang ilan di ginaa nilan mekatag di kepatay nu pated nilan kia.

* ^{11:9} ^{11:9} Kiai sinamingay ni Isus ditu nga sakupen, pu' adun mesuunan nilan pu' ndi' ilan mekendun dun ditu Judea.

²⁰ Naa si Marta, bena' midengegen pu' pegdateng si Isus, inangayen sungkakay, laak si Maria, mibilin diag balay nilan. ²¹ Mendadi kini si Marta, kali' pektalu' dini Isus, “Sir, sa' sia diniin ka, ndi' sia matay su patedu! ²² Dagid pia ma'antu, suunan ku pu' adini penengiin mu tu Megbebaya', begayen dini'a.”

²³ “Metubu' puli' ki pated mu kiin,” laung ni Isus.

²⁴ “Naa suunan ku,” simbag ni Marta, “petubu'en puli' nu Megbebaya' su nga getaw di gendaw kiin sa' sungu na melengkebig benwa, kaas metubu' daan puli' si Lazaro.”

²⁵ Kali' pektalu' si Isus diniin, “Naani mekpetubu' puli' tu nga getaw, muka' naan dademai puun nu ketubu' nu getaw. Adin su getaw metuudan dinaan, pia matay, metubu' puli'. ²⁶ Muka' adin su metubu' muka' sumalig dinaan, ndi' na matay iin. Metuudan ka dun?”

²⁷ “Wa'a, Sir!” simbag ni Marta. “Mituudanu dun pu' ya'a na tu'u su Tindu' nu Megbebaya' Meglekaunutan, sug Bata' nu Megbebaya', su pidateng nami lumusad dinig lumbang.”

Su Kengaduy ni Isus

²⁸ Bena' mideksu' mektalu' si Marta, minangay meksabi tu pateden kia si Maria. Kimeden dun dayun, laungen, “Diin na su Mekpetu'un, sinabia niin.” ²⁹ Kali' medengeg ni Maria, migdedali' megbuat, miditu dayun sumungkak dini Isus. ³⁰ (Pu' nda' pa dateng diag lunsud si Isus, ditu pa tanda' nu pekita'an nilan ni Marta.) ³¹ Naa su nga getaw Judea kia megbelangbelang dini Maria diag dialem balay, bena' minita' nilan si Maria migdedali' megbuat muka' luyu, lindug nilan, pu' laung nilan dun meditug lebeng lumalek.

³² Naa si Maria, bena' minateng dia ni Isus, miglaub di gedapanen. “Uu Kaunutan,” laungen, “sa' sia diniin ka, ndi' sia matay su patedu!”

³³ Mendadi si Isus, sa' minita'en si Maria luminalek sampay su ngag dumanen getaw Judea luminalek dailan dema, misasawi ginaanen, milegenan pati'. ³⁴ “Adin niu libeng?” sinaaken.

Kali' ilan sembag, “Naa Sir, unutan ka nami ditu, adun maita' mu.”

³⁵ Mikengaduy si Isus. ³⁶ Laung nu nga getaw dia, “Pegbentayay pa daan niu, mikpetail gupia dini Lazaro.”

³⁷ Laak sug duma, laung nilan, “Naa, pipengita' nu getaw kini sug buta. Mauma nda'en ma metabangi gumul ni Lazaro?”

Su Kepetubu' puli' dini Lazaro

³⁸ Bena' minateng si Isus tug lebeng ni Lazaro, mipati' puli' mesasawi ginaanen. Naa kig lebeng kia, sinangyab, tinakep gembagel batu. ³⁹ Laung dayun ni Isus, “Pegawa' niuig batu kia!”

“Dagid Sir,” laung ni Marta, su pated nu minatay kia, “paat gebii na dig lupa! Medu' na.”

⁴⁰ Kali' sembag si Isus, “Naa, nda' bau pektalu' dini'a pu' sa' sumaliga dinaan, maita' mu ki kelengas nu pegbaya' nu Megbebaya'?” ⁴¹ Inawa' nilan dayun su gembagel batu. Migangag dayun si Isus, kali' pektalu', “Uu Ama', mikpaladpaladu dini'a, pu' mipenemba' mui kenengiu. ⁴² Misuunan ku gebii gendaw pekineegan mau, laak iini mipedengegu dun ki kenengiu dini'a kini, saba' nu nga getaw kini, pu' adun metuudan ilan dun pu' sinugu' mau lumusad dinig lumbang.”

⁴³ Mideksu' menenabi si Isus, minekeg dayun meksabi, laungen, “Uu Lazaro, gua'a na dini!” ⁴⁴ Gumiwa' dayun si Lazaro. Laak linibedan pa penepeten sampay su kemeten

muka' geksuden, pinutus dema tulapuki gulunen. “Uba-day niu,” laung ni Isus, “adun mekepanaw.”

Su Sabut nu Getaw Binesaan si Isus
(Mateo 26:1-5; Marcos 14:1-2; Lucas 22:1-2)

⁴⁵ Naa melaun getaw tumindug dini Maria, mituudan ilan dini Isus sa' minita' nilan su pinggulaulanen kia. ⁴⁶ Laak sug duma, miditu ilan nga Pariseo, pisuun nilan dayun dun ki pinggulaula kia ni Isus. ⁴⁷ Mendadi ki nga Pariseo kini muka' ki nga kaunutan nug belian nu getaw Judea, mikipungun ilan dayun, ilan nu Pikumpungan nu Metaas Gukum nilan. Kali' ilan pektalu', “Naa, alanduni melengas baalen ta? Melaun mekesalebu' pinggulaula nu getaw kiin! ⁴⁸ Sa' ndi' ta pemaagen, megela' sumakup diniin su nga getaw. Mbuus medengeg nu gubirnu ditug Roma, sugu'en nilan dayuni nga sundalu medini, peglaatan nilan dayuni gelal ta kaunutan, pu' geba'en nilan su Pengedapan ta tu Megbebaya' muka' leneden nilani nasud ta!”

⁴⁹ Mendadi sala tawan dinilan si Caifas, iini mitendu' Tampusan Metaas Belian di taun kia, kali' pektalu', “Paa, bengu'bengu'en amu! ⁵⁰ Nda' niu ba mesuunay pu' melengas pa peganti' ta ki sala tawan di kepatay nug launan getaw batul nu megela' matay su tibuuk bansa ta?” ⁵¹ Naa kagina iini Tampusan Metaas Belian, ki tinalu' kini ni Caifas, kana' daniin delendeman. Pidelendem diniin nu Megbebaya' pu' gumanti' di nga getaw Judea si Isus. ⁵² Muka' kana' laak su kepatay nu nga getaw Judea ki genti'enen, pu' pesalabuukenen pa pagid su ke-laun piglegetawan nu Megbebaya' misigwag dig dibabaw lumbang.

⁵³ Mendadi genat tu gendaw kia, ki nga kaunutan kini nu getaw Judea, minengaw ilan su'atan nilan di kepatay nilan dini Isus. ⁵⁴ Sa' ma'nia, nda' pekpaita' si Isus

mekpanawpanaw dia Judea. Midityug lunsud Efraim tu geksid limawa', migbebenwa dia, ilan nu nga sakupen.

⁵⁵ Naa sa' sungu na mektelipuun sug Lumpuk tug Linius, melaun getaw tumiwad ditu Jerusalem genat dig lumibut benwa, minangay ilan mekanu adun mawa' su kelemu'ay nilan. ⁵⁶ Naa pekpenengaun nu nga getaw dia Jerusalem si Isus. Sa' mikpungun ilan ditug Balay Pangedapan tu Megbebaya', miksinaakay ilan, laung nilan, "Naa, ta'i ketalu' niu dun? Si Isus, mabu' ndi' sumaup dig Lumpuk kini?" ⁵⁷ Pu' su nga kaunutan nug belian muka' nga Pariseo kia, pilaktag nilan tu nga getaw, sa' duuni mekesuun dun sa' adin si Isus, subay pesuunen dinilan, adun daapen nilan iin.

12

Binunagan Pagemut si Isus tug Betania

(Mateo 26:6-13; Marcos 14:3-9)

¹ Naa sa' genem gebii pa mektelipuun sug Lumpuk tug Linius, midityug Betania si Isus, sug lunsud ni Lazaro, su pitubu' puli' kiin ni Isus. ² Bena' minateng dia si Isus, pigbesaan nu nga getaw dia di gaan. Iini migilak dun si Marta, dumingan dini nga Isus maan si Lazaro. ³ Mendadi bena' pekaan nailan, si Maria, minalap sala butilya melaga' pagemut piningalan dun nardo, binunagen dayun di geksud ni Isus muka' pinunasen dun sug buuken. Mileep dayun tu seled balay su sapu nu pagemut. ⁴ Naa sala tawan sakup ni Isus, si Judas Iscariote, su tumipu pa dini Isus, kali' pektalu', ⁵ "Baa, mauma dema ki pagemut kiin, nda' ma peksaluy, mabu' malin sia telu gatus denario, adun begay tu nga pubri su galinen?" ⁶ Laak kana' iini tinalu' dun ni Judas pu' melelaat tu nga pubri. Tinalu'en duni ma'nia, pu' megdaaw. Kagina iini meguit tu kwarta ni nga Isus, taang dun malap dun.

⁷ Dagid mikталu' si Isus, “Aba, ma'nia da! Melengas tegu'enen, pengandamen di gendaw nu kelebeng dinaan.
⁸ Su pubri, lelayun niu mpungun megbenwa. Naan dagid, kana' nau maiben dumuma diniu dini.”

Su Sabut nu Getaw, Binesaan si Lazaro

⁹ Naa su nga getaw miglumpuk dia Jerusalem, bena' mi-dengeg nilan pu' minateng na si Isus ditug lunsud Betania, miditu dailan dema, melaun ilan gupia. Mauya'an nilan kita'en nilan pa pagid si Lazaro, su pitubu' puli' ni Isus.
¹⁰ Mendadi sug delendeman nu nga kaunutan nug belian, petain da nilan dema si Lazaro, ¹¹ pu' iini puunanen, melaun getaw Judea sumiway dinilan, suminakup ilan dini Isus.

Pigbesaan si Isus tu Kedatengen tu Syudad Jerusalem

(Mateo 21:1-11; Marcos 11:1-11; Lucas 19:28-40)

¹² Naa bena' migendaw, su nga melaun getaw kia suminaup tug Lumpuk, midengeg nilan pegdateng si Isus dia Jerusalem. ¹³ Mendadi mingalap su nga getaw paka pisa pegbaasbaas nilan basa nilan dini Isus, dayun lumiu ilan diag lunsud, sungkaken nilan si Isus. Mimeksay ilan, laung nilan, “Pegbesaan kini! Melengas pepianan iin nu Megbebaya', ki minateng na pigwekilan nu Kaunutan Megbebaya', ki Gadi' nu getaw Israel!”

¹⁴ Mendadi kini si Isus, duuni minita'en petubu'en nati asno. Sikayanen dayun, maa' dadema nu sinulat pedaan ditu Misulat Talu' nu Megbebaya', laung,

¹⁵ “Yamu nga getaw Sion, ndi' amu mendek! *
 Pu' bentayay pa daan niu, pegdateng na su gadi' niu, peksakay di nati asno.”

¹⁶ Naa su nga saku ni Isus, nda' nilan mesabut di gendaw kia sa' ta' mai suminakay dun si Isus. Laak

* 12:15 12:15 Ki Sion kini, iini sala ngalan nu syudad Jerusalem.

benal midayag na su kelengas nu pegbaya' ni Isus, milabu' dayun dig delendeman nilan su sinulat kia ditu Misulat Talu' nu Megbebaya', dakus su kenggulaula nilan dun diniin di gendaw kia.†

¹⁷ Naa su nga melaun getaw tumindug dini Isus su kesabinen dini Lazaro ditug dialem sangyab dayunen petubu'ay puli', inukitan nilan dun su nga getaw pegbebenwa dia Jerusalem. ¹⁸ Iini minangay dun sumungkak dini Isus su nga getaw, pu' midengeg nilan ki mekesalebu' pinggulaulanen kia. ¹⁹ Mendadi ki nga Pariseo, kali' nilan pegyegayegaay, “Naa, bentayay pa daan niu, daagen ita! Minampu' na diniin su tiba'an getaw!”

Kuminita' sia dini Isusi nga Getaw Grecia

²⁰ Naa duuni nga getaw Grecia minampu' di nga getaw Judea mangay dia Jerusalem mengamuyu' tu Megbebaya' metaang dig Lumpuk kia. ²¹ Mendadi ilan kini, luminabet ilan dini Felipe, (si Felipe, getaw Betsaida sakup Galilea). Kali' ilan pektalu' diniin, “Sir, kumita' ami sia dini Isus.”

²² Sa' ma'nia, linaawan ni Andres si Felipe, pisuunen diniin su kenengi nu getaw Grecia, dayun ilan dua' mangay mekpesuun dini Isus. ²³ Mendadi benal midengeg ni Isus, kali' pektalu', “Naa, mitektak na su sesa'. Naan kini, kig Bata' nu Kilawan, begay na dinaan nu Megbebaya' su kelengas nu pegbaya'u. ²⁴ Taman talu'u diniu, pinenggi' su sebalu trigo, sa' ndi' metena' tug lupa' muka' lebengen, nda'i pulesen. Laak sa' metena' tug lupa' muka' lebengen, iini sungku' gupia.‡ ²⁵ Naa adini mpauk megwakil gumulen dinaan, mbeleng diniin su ketubu' nda'i tamanen.

† 12:16 12:16 Ki telu'en kelengas nu pegbaya' ni Isus, ma'ananen su keganti'en tu kepatay nu getaw muka' su ketubu'en puli', kampu' nu kelentunen ditu dapit lintu nu Megbebaya'. ‡ 12:24 12:24 Ma'ananen, sa' matay si Isus, melaun dayuni sumakup diniin.

Adin su pegwakilen dinaan su gumulen, iin, malapen sungkin su ketubu' nda'i tamanen. ²⁶ Mendadi sa' duuni getaw mauya'anen megabang dinaan, iin, subay dumunut dinaan. Pia tanda'u, ditu dadema iin. Sa' megabang dinaan, iin demai pegbesaan nu Gama'u.”

Su Kepesuun na ni Isus tu Kapatay diniin

²⁷ Kali' pektalu' si Isus, “Milegenanu ini. Ndi'u mesu-unani gempia penenebiin ku. Penenebiin ku ta', ‘Uu Ama', gawen mau di kelegenayu'? Ndi' mesu'at, pu' iini luminusadu dun dinig lumbang, adun melegenanu.”
²⁸ Minenabi dayun si Isus, laungen, “Uu Ama', pegleep mu sug dengegan mu!”

Duun dayuni miktalu' ditug langit, laungen, “Pigleepu na sug dengegan ku muka' pegleepen ku pa puli'.”

²⁹ Bena' midengeg nu melaun getaw pegindeg dia, laung dun nug duma, limudu'an. Laung dun pagid nug duma, “Mabu' duuni sesugu'en nu Megbebaya' getaw langit migabitabit diniin!”

³⁰ Dagit kali' pektalu' si Isus, “Kana' naani pidengegan dun ki tingeg kiin, pidengeg diniu. ³¹ Pu' minateng nai gendaw tindu' nu Megbebaya', ukumanen su tiba'an getaw. Nemun su meglekaunutan di tiba'an getaw, su Palin, daagen iin. ³² Naan, sa' mainatu adun melansangu dia, empunen ku sug launan getaw megela' mekesakup dinaan.” ³³ (Iini miktalu' dun si Isus, pu' adun mesuunan nu nga getaw kig bian nu kepatayen.)

³⁴ Kali' sembag su melaun getaw, “Naa iini mipesuun dinami nu Palinta dinami kanugdiin, pu' su Tindu' nu Megbebaya' Meglekaunutan, nda'i gumulen. Naa sa' ma'antu, sa' iinig laung mu Bata' nu Kilawan, mauma tinalu' mu mainat iin adun melansang dia? Ta' taway duni Bata' nu Kilawan kiin?”

³⁵ Kali' sembag si Isus, “Taman talu'u diniu, ki Tiag kini, ndi' na maiben di mata niu, kaas sinegay dini pa su Tiag, bundas amu panaw, adun ndi' amu medepetan nu medelem. Adin su mpanaw di medelem, ndi'en mesuunani gengayanen. ³⁶ Selian diin pa mata niu, subay metuudan amu tu Tiag, adun mbaal amu sakup nu Tiag.”

Su Kemilas nu nga Getaw Judea

Mendadi sikna mideksu' mektalu' si Isus, bilenganen su nga getaw kia, pigliawen ilan dayun. ³⁷ Pu' pia melaun mekesalebu' pinggulaulanen dia gedapan nilan, nda' ilan metuuday dun diniin. ³⁸ Ma'nia, minuud su sinulat dengantu nu pimuunan nu Megbebaya' si Isaias, laungen, “Uu Kaunutan, ta' taway duni mituudan dun su ginukit nami dinilan? Nda'idun. Muka' ta' taway duni pinita'an di pegbaya' nu Kaunutan? Nda'idun.”

³⁹ Sa' ma'nia, su nga mikaita' tu mekesalebu' pinggulaula ni Isus, nda' ilan metuuday dun. Pu' duun pagidi sala sinulat ni Isaias, laungen,

⁴⁰ “Lininged nu Megbebaya' su nga mata nilan, adun ndi' nilan maita'.

Pitegasen su nga gulu nilan

adun ndi' nilan mesabut,

pu' tekaw mbuus lumingay dailan puli' dinaan, laung nu Megbebaya',

adun peneguli'an ku ilan.”

⁴¹ Iini miktalu' dun si Isaias ma'nia, pu' minita'en su kelengas nu pegbaya' ni Isus, dayun inukiten.

⁴² Pia ma'antu, melauni kaunutan nu getaw Judea mituudan dini Isus, laak pigbuni nilan. Nda' nilan pekpaillag, pu' mindek ilan mbuus utidan ilan nu nga Pariseo di simbaan nu getaw Judea. ⁴³ Iini mauya'an nilan, pegbesaan ilan nu nga getaw, sabaya' nu Megbebaya'.

Su Talu' ni Isus, iini Mukum tu nga Getaw

⁴⁴ Naa mendadi, minekeg mektalu' si Isus, laungen, “Adin su metuudan dinaan, kana' naan laak su pituuden, pu' pituuden dadema su suminugu' dinaan. ⁴⁵ Muka' adin su getaw mekaita' dinaan, maita'en dadema su suminugu' dinaan. ⁴⁶ Naani Tiag, midiniinu lumbang adun pedelangan ku sug delendeman nu nga getaw. Adin su getaw metuudan dinaan, ndi' metenlen di medelem. ⁴⁷ Muka', adin su mekedengeg tu talu'u, asa ndi'en pektalentedan, kana'u mukum dun. Pu' kana' iini midiniinu dun pu' adun mengukum tu nga getaw, segaga iin sungkini midiniinu dun, guunen ku su nga getaw. ⁴⁸ Adin su memilas dinaan muka' memilas dadema tu talu'u, duuni mengukum dun. Su tinalu'u, iini mengukum dun sa' sungu melengkebig benwa. ⁴⁹ Di menepet metuud lai daan, kana' mikpuun tu pegbaya'u su tinalu'u, iini tinalu'u tu nga getaw, su laak sinugu'an dinaan nu Gama' ta. ⁵⁰ Suunan ku su sinugu'anen, iini megbegay ketubu' nda'i tamanen, kaas iini tinalu'u, su sinugu'an dinaan nu Gama' ta.”

13

Inugasan ni Isus su Geksud nu nga Sakupen

¹ Naa, sendaw pa mektelipuun sug Lumpuk tug Liniusan. Mendadi kini si Isus, misuunanen pu' minateng na ki kegawa'en dinig lumbang, adun muli' ditu Gama'en. Kagina melelaat gupia tu nga piglegetawanan dinig lumbang, mauya'anen paिता'en dinilan su gikteb lelaaten dinilan.

² Mendadi, miglebungan si nga Isus. Naa kini si Judas Iscariote, bata' ni Simon, daan na pinulayan nu Palin tumipu dini Isus. ³ Si Isus, misuunanen pu' migela' pegwakil diniin nu Gama'en su pegbaya' dig launanen. Misuunanen dadema pu' pigenatanen su Megbebaya', muka' su Megbebaya' dadema uli'anen. ⁴ Mendadi migbuat si

Isus dia penganan, liwasen su suuben muka' linibedanen tualyai gawaken. ⁵ Tinukakanen dayun tubigi palenggana, mikpuun dayun mengugas di geksud nu nga sakupen, pimunasanen dayun tualya kia linibed di gawaken. ⁶ Laak bena' midepet dini Simon Pedro, laung ni Pedro, “Aba, Sir, masi' ya'a mai mengugas di geksudo?”

⁷ Kali' sembag si Isus, “Nda' mu pa mesabut nandaw ki pinggulaulaan ku kini dini'a. Laak mesuunan mu da sa' maiben.”

⁸ Laung ni Pedro, “Sampay saumulu, ndi'u lai begay ugasan mui geksudo!”

“Sa' ndi' mu paugasi geksud mu dinaan, kana'a na sakupu,” simbag ni Isus.

⁹ Kali' sembag si Simon Pedro, “Sa' ma'antu, Sir, kana' laak nu geksudui ugasan mu! Sampay kemetu muka' guluu pa pagid!”

¹⁰ Miksembag pelum si Isus, “Naa kana'. Adin su mikeligu' na, miugasan nai tibuuk lawasen, ndi' na kambat meligu' puli'. Subay ugasan laaki geksud dig lepup lupa'. Naa, yamu dema, miugasan namu, laak nda' amu megela'.” ¹¹ (Kaas tinalu' dun ni Isusi ma'nia pu' nda' ilan megela' maugasay, pu' misuunanen sa' ta' taway dun dinilani tumipu diniin.)

¹² Bena' mitubusen ugasay su geksud nilan, si Isus, siluken puli'i suuben muka' mipuli' diag lemisaan. Kali' pektalu' dinilan, “Naa mesabut ma niui pinggulaulau dinui kini? ¹³ Gilal niau Mekpetu'un muka' Kaunutan. Paladpalad sa' ma'nia, pu' naan, tantu mikpetu'unu dinui muka' miglekaunutanu dinui. ¹⁴ Naa, sa' naani mikpetu'un dinui muka' miglekaunutan dinui, dayun naani mingugas di geksud niu, subay peginugasay amu geksud niu. ¹⁵ Ki pinggulaulau kini, binaalu lendasan, adun penunggilingan niu, kaas pekpepiyanay

amu. ¹⁶ Taman talu'u diniu, su sesugu'en, kana' metaas pa di suminugu' diniin, muka' su pegwekilan, kana' metaas pa di migwakil dun. ¹⁷ Ma'antu, sa' mesabut niu ini, leliagen amu dun sa' penggulaulaan niu!”

¹⁸ Diksu' ni Isus, “Laak dagid ki tinalu'u kini, kana' mekatag diniu gela'. Misuunan kuig delendeman nu nga pimili'u sumakup dinaan, laak dagid iini mpenggulaula, adun menuud su sinulat ditu Misulat Talu' nu Megbebaya', laung, ‘Ki suminalu gupia dinaan maan, iin dademai tuminipu dinaan.’ ¹⁹ Naa, iini telu'en ku diniu nandaw, su nda' pa mpenggulaula, adun sa' mpenggulaula na, metu-udan amu dun naan su pektelu'en ku. ²⁰ Taman talu'u diniu, adin su menemba' tu sugu'en ku, naa gitunganen, naani mipenemba'en. Pidag pa tanan, kagina pinemba'u niin, mipenemba'en dadema su suminugu' dinaan.”

Pisuun Pedaan ni Isus su Ketipu diniin

(Mateo 26:20-25; Marcos 14:17-21; Lucas 22:21-23)

²¹ Bena' mideksu'i tinalu'en kia, milayu' dayuni ginana ni Isus. Pinluksaden dayun telu'ay di nga peneliganen kia, “Taman talu'u diniu, ki sala tawan diniu, mektipu dinaan.”

²² Miksesindapay dayun su nga sakupen, pu' misebu'an ilan dun gupia sa' ta' taway duni mitendu'anen tu talu'en kiin. ²³ Naa sala tawan di nga sakup ni Isus, su petailenen gupia, pegingkud dia gupid ni Isus. ²⁴ Mendadi kinipayan dayun iin ni Pedro, laungen, “Saak mu lai diniin sa' ta' taway duni pektelu'enen kia.”

²⁵ Minigini sakupen kia dia mesempel ni Isus, sinaaken dayun diniin, “Sir, ta' taway dun iin?”

²⁶ Kali' sembag si Isus, “Naa, duliten ku di sabawi pan kini. Adin su tulunan ku dun, iin nain.” Bena' dinuliten tu'u, tinulunen dayun dini Judas, sug bata' ni Simon Iscariote. ²⁷ Kini si Judas, bena' mitabuken su

pan, pingepu'an dayun ni Satanas. Laung ni Isus diniin, “Naa kig baalen mu, baal mu na dayun!”²⁸ Naa su ngag duma sakup ni Isus dia penganan kia, nda'idun dinilani mekesabut dun sa' ta' alanduni tinalu' dun kia ni Isus dini Judas.²⁹ Laung dun nu ngag duma, kagina si Judasi meguit tug bata' kahun betangan nu kwarta nilan, sinugu' ni Isus diniin mangay menaluy gimpan dig Lebungan nilan gindan ditug Linius. Laung dun nug duma, sugu'en ni Isus pemegayanen su nga pubri.

³⁰ Bena' inaanen su pan kia, tumikaw dayun gua' si Judas. Gebii kia dema.

Sug Begu Titulu'an

³¹ Bena' gumiwa' dia si Judas, kali' pektalu' si Isus, “Naa naan kini, kig Bata' nu Kilawan, mbuasan nai kelengas nu pegbaya'u. Buasan ku dadema su kelengas nu pegbaya' nu Megbebaya'.³² Sa' mbuasan na su kelengas nu pegbaya' nu Megbebaya' pebian dinaan, su kelengas nu pegbaya'u, buasan ganam nu Megbebaya' meksekat di keksalabuuku diniin, naan kini, kig Bata' nu Kilawan.³³ Yamu nu nga binata'u, kana' nau maiben dumuma diniu dini. Penengaun niau dayun, laak puli'an ku talu' diniu su tinalu'u tu nga kaunutan nu getaw Judea pu' ndi' amu mekeditu pegengayan ku.³⁴ Laak pengumbilin ku diniu kig begu palinta, pekpinetailay amu gupia. Pekpinetailay amu maa' nu kepetailu diniu.³⁵ Iin dayuni kesuun dun nu nga getaw pu' yamui sakupu, sa' mekpinetailay amu.”

Pisuun Pedaan ni Isus su Kemalaw ni Pedro diniin (Mateo 26:31-35; Marcos 14:27-31; Lucas 22:31-34)

³⁶ Sinaak ni Simon Pedro dini Isus, “Sir, adin ka ma angay?”

Kali' sembag si Isus, “Ndi'a pa mekedunut dinaan nandaw ditu pegengayan ku. Dagid duuni gendaw, mekeglenduga daan tu'u.”

³⁷ “Laak Sir,” sinaak ni Pedro, “mauma dema ndi' pau mekedunut dini'a nandaw? Minuya' nau meksaliunung dini'a!”

³⁸ “Ta' ma, Pedro,” simbag ni Isus, “meksaliununga tantu dinaan? Taman talu'u dini'a, dekag pasi' peguni su manuk, metelu deksu'a na memalaw pu' kana' mau mailala.”

14

Si Isusig Bianan Mangay tu Gama' Megbebaya'

¹ Kali' gusay pektalu' si Isus, “Naa yamu, ndi' amu melibuleng. Salig amu tu Megbebaya', salig damu dema dinaan. ² Sug balay nu Gama'u, melauni suguden. Megunau ditu, endamen ku su nga pegbenwanan niu. Sa' kana' metuud, ndi'u na sia ukit diniu. ³ Sa' ditu nau, mandamu dayun su ngag daniu, mpuli'u dini engain ku amu, adun pia tanda'u, ditu damu dema. ⁴ Muka' mesuunan niuig bianan pangay ditu pegengayan ku.”

⁵ Naa sala tawan dinilan si Tomas, kali' pektalu', “Sir, nda' nami suunay su pegengayan mu. Kenduta' mai kesuun nami dun sug bianan?”

⁶ Kali' sembag si Isus, “Naa, naan laig bianan megbuas tu metuud mekatag di Megbebaya', muka' naani megbegay tu nga getaw ketubu' nda'i tamanen. Nda'i getaw mekangay ditu Gama' ta, subay mekebian dinaan. ⁷ Kagina suminambat amu dinaan, suminambat damu dema tu Gama'u. Genat nandaw sumambat amu gupia diniin, muka' minita' na niu su Gama'u.”

⁸ Naa sala tawan dinilan pelum si Felipe, kali' pektalu', "Sir, sa' mesu'at, paita' mu dinami su Gama' mu, iini sukal dinami."

⁹ Kali' sembag si Isus, "Kitui kaibenen duminumau diniu, Felipe, laak nda' mau pa gusay tantu mailala? Adin su mikaita' dinaan, mikaita' dadema tu Gama'u. Ta' mai telu'an mau dun paita'u diniu su Gama'u? ¹⁰ Masi', Felipe, nda'a pa metuuday dun pu' naan muka' su Gama'u, iin da tanan? Su pektelu'en ku diniu, kana' laak delendeman ku, su Gama'u sumalabuuk dinaan, iini mikpepenggulaula dun dinaan. ¹¹ Subay metuudan amu dun ki tinalu'u pu' salabuuk ami nu Gama'u di ginaa. Laak sa' ndi' amu metuudan dun, subay metuudan amu saba' nu pinggulaulau. ¹² Taman talu'u diniu, adin su suminalig dinaan, penunggilinganen su pinggulaulau, muka' mekesalebu' pai penggulaulaanen, pu' muli'u tu Gama'u. ¹³ Pia alanduni penenebiin niu, sa' sumalabuuk amu dinaan, naa penggulaulaan ku, adun megleepig dengegan nu Gama' ta Megbebaya'. ¹⁴ Pia alanduni penenebiin niu dinaan, sa' sumalabuuk amu dinaan, naa penggulaulaan ku."

Su Pinasad tu nga Mekpetail dini Isus

¹⁵ Kali' gusay pektalu' si Isus, "Naa, sa' mekpetail amu dinaan, subay petuuden niu su nga sugu'an ku. ¹⁶ Penengiin ku dayun tu Gama' ta begayan amu niin sala pa Mengingabang, su dumuma lelayun diniu. ¹⁷ Iin sug Balakat nu Megbebaya', su megbuas diniu tu metuud mekatag di Megbebaya'. Iin, ndi' mpenemba' nu ngag duma kilawan dinig lumbang kini, pu' ndi' nilan maita', muka' ndi' ilan sumambat diniin. Laak yamu, suminambat amu diniin, pu' suminala na diniu, muka' bigay na diniu.

¹⁸ "Naa, mekawa'u pasi' dini, laak ndi'u amu belengan maa' nu gidu, pu' mpuli' dau dini niu. ¹⁹ Ndi' maiben, ndi'

nau gusay maita' nu nga kilawan, laak dagid yamu, maita' pa niau puli'. Kagina metubu'u, metubu' damu dema di nda'i tamanen. ²⁰ Sa' mateng ki gendaw kia, mesuunan niu pu' naan muka' su Gama'u, iin da, muka' salabuuk daita dema di ginaa.

²¹ “Adin su dumawat tu sugu'an ku muka' mekpetuud dun, iini mekpetail dinaan. Muka' dema adin su mekpetail dinaan, iini petailen dadema nu Gama'u. Melelaat dau dema diniin muka' mekpaita'u dun gupia.”

²² Naa sala tawan dinilan si Judas (sangay ni Judas Iscariote), kali' pektalu', “Sir, ta' mai mekpaita'a dun dinami, laak dagid ndi'a mekpaita' tu tiba'an getaw?”

²³ Kali' sembag si Isus, “Adini getaw mekpetail dinaan, dunutanen su titulu'an ku. Melelaat dun dayun su Gama'u muka' meditu ami niin. Pu' yami dua' nu Gama'u, sumala ami diniin megbenwa. ²⁴ Naa, adin su ndi' mekpetail dinaan, ndi'en dunutan su titulu'an ku. Su telu'en ku medengeg niu, kana' danaan laak delendeman, pu' danu Gama'u, su suminugu' dinaan.

²⁵ “Naa, su saanan ku dini niu, pektelu'en ku ia diniu. ²⁶ Sa' mpalus nau dini niu, kig Balakat nu Megbebaya', su Mengingabang, sugu'en nu Gama'u medini niu, pu' iini meksalabuuk gupia dinaan. Pektu'unan amu niin dayun dig launanen, muka' tegyungen amu niin tug launan tinalu'u diniu.

²⁷ “Mendadi, iini pengumbilin ku diniu, ki pianan ginaa, ma'niin nug danaan. Kana' maa' nu kebegay dun nu kilawan, kaas ndi' amu melibuleng muka' ndi' amu mendek. ²⁸ Midengeg niu su tinalu'u pu' mpalus nau dini niu muka' mpuli' dau dini. Sa' mekpetail amu gupia dinaan, leliagen amu dun sia sa' muli'u tu Gama'u, pu' iini metaas pa dinaan. ²⁹ Iini tinalu'u dun diniu su nda' pa mpenggulaula, pu' adun sa' mpenggulaula na, sumalig

amu dinaan. ³⁰ Naa, ndi'u paibene ni telu'en ku diniu, pu' peksebang na dini su kaunutan nu tiba'an getaw, su Palin. Nda'i pegbaya'en dini naan. ³¹ Laak dagid penggulaulaan ku laak su sinugu'an dinaan nu Gama'u, adun mesuunan nu nga kilawan pu' petailen ku su Gama'u.

“Kaas pegbuat amu, pu' gua' ita dini.”

15

Su Kesalig nu nga Suminakup dini Isus

¹ Kali' pektalu' si Isus tu nga sakupen, “Mendadi, naani tantu puun nu pimula. Su Gama'ui megingat dun. ² Adin su pangau ndi' megbunga, tenluun nu Gama'u, muka' adin su megbunga, timpadanen, adun meksilaun paig bunganen. ³ Naa, yamu nu nga sakupu, ma'niin namu nu miugasan nu tinalu'u diniu. ⁴ Kaas salabuuk amu gusay dinaan. Salabuuk dau dema diniu. Pu' sa' su panga nu pimula, ndi' mekegbunga sa' suuay tu puunen. Ma'antu damu dema, ndi' niu mpenggulaulaani gempia, subay sumalabuuk amu dinaan gusay.

⁵ “Naa, naani puun nu pimula, yamui nga panganen. Adin su sumalabuuk dinaan lelayun, muka' sumalabuuk dau dema diniin, iini megbunga melaun. Pu' sa' kana' da naan, ndi' niu mpenggulaula. ⁶ Naa, sa' duuni getaw ndi' sumalabuuk dinaan, mesama tu panga belengen kaas megangu dayun. Pungunen dayun sug launan migangu, pemiglaken tu gapuy adun metutung. ⁷ Sa' sumalabuuk amu dinaan gusay, muka' mengganget pa padun dig delendeman niu ki telu'en ku, pia alanduni penenebiin niu, begay diniu nu Gama'u. ⁸ Pu' sa' penggulaulaan niui gempia, megleep dayunig dengegan nu Gama'u, muka' mekpalas su kesakup niu dinaan. ⁹ Naa, melelaatu diniu maa' nug lelaat nu Gama'u dinaan. Yamu dema, subay salig amu lelayun tug lelaatu diniu. ¹⁰ Sa' petuuden niu

su nga tinitulu'u diniu, sumalig damu dema dayun dig lelaatu diniu. Ma'niin dinaan, pituudu su tinitulu' nu Gama'u, muka' suminalig dau dig lelaaten dinaan.

¹¹ “Naa tinalu'u ia diniu, adun meleep diniuig leliagu, muka' megela'ig leliag niu. ¹² Iini pinalintau diniu, pekpinetailay amu lepeng di kepetailu diniu. ¹³ Su tampusan petailan, iin sa' upama duuni getaw sumaliunung tu sambaten, iin, lamig da dun matay saba' tu petailanen. ¹⁴ Naa yamu, sambatu amu sa' penggulaulaan niu su nga tinitulu'u diniu. ¹⁵ Ndi'u na paingalan diniu nga sesugu'en ku, pu' paingalan ku diniu nga sambatu. Sa' upama ki sesugu'en, ndi'en suunani penggulaulaan nu tuminindan diniin, laak yamu, migela'u pesuun diniu su midengegu di Gama'u. ¹⁶ Kana' yamui mimili' dinaan. Naani mimili' diniu, muka' tindu'u amu mangay amu menggulaula gempia, ma'niin memunga amu ngag bunga nda'i gikteben. Kaas adin su penenebiin niu tu Gama' ta, sa' sumalabuuk amu dinaan, begayen diniu. ¹⁷ Iin dayuni titulu'u diniu, pekpinetailay amu.”

Su Kebanta nu ngag Lain Getaw tu nga Sakup

¹⁸ Laung padun ni Isus, “Naa, su nga kilawan, sa' megbanta ilan diniu, ndi' niu selingaway pu' miunau nilan bentaay. ¹⁹ Sa' sia duma amu nu nga kilawan dig lumbang kini, mekpetail ilan sia diniu, pu' metau ilan melelaat tu samataw nilan. Kagina pimili'u amu di nga kilawan muka' pinaasu amu dinilan, bentaan amu nilan. ²⁰ Ndi' niu selingaway su tinalu'u diniu pu' su sesugu'en, kana' metaas pa di suminugu' dun. Kaas sa' peglegetanu nu nga kilawan, peglegetan damu dema nilan. Laak dagid sa' dunutan nilan su tinitulu'u, dunutan da nilan dema su titulu' niu. ²¹ Iini puun gupia nug launan kegleget nilan diniu, pu' saba' sakupu amu muka'

nda' nilan mesuunay su suminugu' dinaan medini niu. ²² Sa' sia nda'u pedini mekpetu'un dinilan, nda' siai sala' nilan. Laak nemun nda'ig lapal nilan di nga sala' nilan. ²³ Adin su getaw megbanta dinaan, megbanta dadema tu Gama'u. ²⁴ Sa' nda' nilan sia maita' su pinggulaulau nda' mainsan penggulaulaay nug lain getaw, nda' siai sala' nilan. Laak gembagel nai sala' nilan, pu' minita' na nilan su mekesalebu' pinggulaulau, laak nda' nilan petuuday, kaas bentaanu nilan muka' su Gama'u. ²⁵ Su kebanta nu nga kilawan, iini mipenggulaula dun adun menuud su sinulat dengantu di Palinta nilan. Pu' nda' ba mesulat, 'Nda'i saba'u dun ki kebanta nilan dinaan.' ”

²⁶ Laung pa ni Isus, “Naa, su Mengingabang sugu'en ku medini niu, sug Balakat nu Megbebaya', sa' mateng nain, peglegintuudenu niin di nga getaw, pu' buasanen su metuud mekatag di Gama'u. Pigenatanen padun su Gama'u. ²⁷ Yamu dema, peglegintuuden niau tu nga getaw, pu' genat di pikpuunanen, suminalabuuk amu dinaan.”

16

¹ Maa' laung padun ni Isus, “Naa iini tinalu'u dun diniug launanen, adun pia melegenan amu, ndi' amu lumukas sumalig dinaan, kaas tuliud amu tu kekpetuud niu. ² Duuni gendaw mateng, utidan amu nu nga getaw Judea dia simbaan nilan. Muka' dema, duuni nga getaw, sa' bunu'en amu nilan, laung nilan dun, suminugut ilan tu Megbebaya'. ³ Mema'antu ilan, pu' nda' ilan sambat tu Gama' ta, muka' nda' ilan dema sambat dinaan. ⁴ Iini tinalu'u dun diniu, adun sa' matengi gendaw nu kegleget nilan diniu ma'nia, melabu' dayun dig delendeman niu pu' iin na su pektelu'en ku.”

Su Gabang nug Balakat nu Megbebaya'

Laung padun ni Isus, “Naa ki nga tinalu'u kini diniu, genat tu puunanen, nda'u pesuun diniu, pu' duminuma pau diniu. ⁵ Nandaw pisuun ku na diniu, pu' muli'u tu suminugu' dinaan. Bisan ma'antu, pia sala tawan diniu, nda'i suminaak dun dinaan sa' tanda'u pangay. ⁶ Laak dagid miuba' amu gupia saba' nu tinalu'u diniu. ⁷ Taman talu'u diniu, mpianan amu sa' mawa' nau dini. Sa' ndi'u mawa' dini, naa su Mengingabang diniu, ndi' medini niu. Laak sa' mawa'u dini, sugu'en ku iin medini. ⁸ Muka' ki Mengingabang kini, sa' mateng, pesuunen di nga kilawan su sayep nilan mekatag di sala', di kekesuun, muka' di ginukuman. ⁹ Pesuunen dinilan su sayep nilan mekatag di sala', pu' su puun nug limbung, iin su kemilas nilan dinaan. ¹⁰ Pesuunen dadema dinilan su sayep nilan mekatag dig bianan nu kekesuun, pu' muli'u tu Gama'u, ndi' niau dayun maita'. ¹¹ Pesuunen pa padun dinilan su sayep nilan mekatag di ginukuman di nga kilawan, pu' su Palin, su kaunutan nu tiba'an kilawan, daan na inukuman. ¹² “Melaun pai telu'en ku diniu, laak nemun, ndi' na niu muitan. ¹³ Laak kig Balakat nu Megbebaya', su megbuas di metuud mekatag di Megbebaya', sa' mateng na, munut diniu tu taman metuud. Su telu'enen, kana' mikpuun tu pegbaya'en, iini pesuunen su da medengegen. Telu'enen dadema su gembianan tug binaya' gebii bu' gendaw. ¹⁴ Megleepig dengegan ku puun diniin, pu' petendayen dadema diniu su pemuun ku. ¹⁵ Adin sug danu Gama'u, danaan dadema, kaas kiai tinalu'u dun pu' petenday diniu nug Balakat nu Megbebaya' su pemuun ku.”

Su Kelegenay niu, Mbaluy Leliag niu

¹⁶ Laung padun ni Isus, “Naa naan kini, ndi' nau maiben di mata niu. Dayun laak ndi' maiben, maita' da niau puli'.”

¹⁷ Duun dayuni nga sakupen miksinaakay, laung nilan, “Ta' mai tinalu'en dun dinita pu' ndi' na maiben di mata ta, dayun ndi' maiben, maita' ta daw puli'? Ta' alanduni guluganeni tinalu'en kia, ‘Pu' muli'u,’ laungen, ‘tu Gama'u’? ¹⁸ Ta' mai guluganeni tinalu'en kia, ‘Ndi' maiben’? Ndi' ta mesabut!”

¹⁹ Naa, si Isus, misuunanen pu' saakan nilan sia. Kali' pektalu' dinilan, “Iin mai migdua'dua'ig delendeman niu dun su gulugan nu tinalu'u diniu pu' ndi' nau maiben di mata niu, dayun ndi' maiben, maita' da niau puli'? ²⁰ Taman talu'u diniu, mektenlis amu mengaduy, melegenan amu, laak su ngag lain kilawan, leliagen. Su kelegenay niu, ndi' maiben mbaluy leliag niu. ²¹ Pinenggi' duunig libun megbata'. Sa' sungu megbatik tian, melibuleng. Laak sa' migbata' na, milingawanen su kelibulengen, pu' liliag tug bata'en migigetaw na dinig dibabaw lumbang ta kini. ²² Yamu, ma'antu damu dema, melegenan namu. Laak dagid mekita' ita puli', dayun megela'ig leliag niu, muka' nda'idun nai mekepalin dun diniu.

²³ “Taman talu'u diniu, ki gendaw kiin, ndi' na niau mesaakan, pu' iini penengian niu su Gama'u. Pia alanduni penenebiin niu diniin, begayen diniu sa' sumalabuuk amu dinaan. ²⁴ Sampay nemun, nda'i pinenabi niu mesembayan pa niui ngalan ku. Naa, penenabi amu, begayan amu dayun, adun megela'ig leliag niu.”

Dinaag na ni Isus su Kaunutan nu Tiba'an Getaw

²⁵ Mendadi, diksu' ni Isus ki tinalu'en, laungen, “Naa, kiai sinambangayu diniu, laak sungu matengi gendaw, ndi' nau meksambangay, pu' penluksaden ku na diniu gupia sug betad nu Gama' ta. ²⁶ Naa ki gendaw kiin, sa' menenabi amu, mesambay niui ngalan ku. Ndi'u namu kambat penenebian tu Gama' ta, ²⁷ pu' iin, melelaat

dadema diniu gupia. Melelaat diniu, pu' mekpetail amu dinaan, muka' mituudan amu dun pu' pigenatan ku iin.
²⁸ Su kediniin ku lumbang, genatu tu Gama' ta. Nandaw, mawa'u dinig lumbang, pu' muli'u tu Gama' ta.”

²⁹ Kali' pektalu' su nga sakupen, “Naa, pinluksad mu na, nda' mu na sambingayay. ³⁰ Misuunan na nami pu' ya'ai mekesuun tug launanen. Pu' pia ndi'a saakan nu getaw, sembagen mui misebu'an dun, kaas mituudan ami dun pu' genata tu Megbebaya'.”

³¹ Kali' talu' si Isus, “Mituudan bamu dun nandaw?
³² Bentayay pa daan, pegdateng na su gendaw megela' amu mesigwag, pu' belengan niau, piksesala tawan diniu, muli' tug balayen. Muka' minateng nai gendaw kia. Laak kana'u da sala, pu' suminalabuuk dinaan su Gama'u.
³³ Iini tinalu'u dun diniu, adun mpi'ai ginaa niu puun di keksalabuuk niu dinaan. Peglegetan amu nu nga kilawan saba' nu keksalabuuk niu dinaan. Laak ndi' amu mendek, pu' dinaagu na su nga kilawan!”

17

Pinenebian ni Isus su nga Sakupen

¹ Mendadi si Isus, bena' mideksu' mektalu', migangag tug langit, kali' penenabi, laungen, “Ama', mitektak na su sesa'. Paita' mu di nga getaw su kelengas nu pegbaya'u, naan kig Bata' mu, adun paita'u dinilan su kelengas nug dani'a. ² Pu' bigay mu megbaya'u di tiba'an getaw, adun begayan ku ketubu' nda'i tamanen su nga getaw pisalig mu dinaan. ³ Adin su getaw mekesuun dini'a, su tantu Diwata, muka' mekesuun dinaan, si Isukristu ki sinugu' mu medinig lumbang, iini mpeduunan ketubu' nda'i tamanen. ⁴ Su kelengas nu pegbaya' mu, pinita'u na di nga kilawan dinig lumbang kini, pu' gila'u tubusay su pipenggulaula mu dinaan. ⁵ Uu, Ama'! Su nda' pa mbaalig

lumbang, miksyalabuuk ita di kelengas nu pegbaya' ta. Nandaw, uli' mu dinaan su kelengasen.

⁶ “Naa, ki nga getaw kini pisakup mu dinaan pimili' mu tu nga kilawan, pisuun ku dinilan ki gasal mu. Bekna, sakup mu ilan, dayun pisakup mu ilan dinaan. Pituud nilan dadema su tinalu' mu. ⁷ Muka' nemun, misuunan nilan pu' ya'ai pigenatan nug launan taman nug bigay mu dinaan. ⁸ Pitendayu dinilan su pimuun mu dinaan, muka' dinawat nilan ia, kaas misuunan nilan tu'pu' ya'ai pigenatan ku. Mituudan ilan dun pu' suminugu'a dinaan medini.”

⁹ Laung pa ni Isus, “Naa ki nga bigay mu dinaan, penenebian ku ilan dini'a, pu' ilan, dani'a tu'pu'. Kana' nu tiba'an getaw dig lumbang kinii penenebian ku. ¹⁰ Kig launan danaan, dani'a dadema. Sug launan dani'a, danaan da pagid, kaas maita' na su kelengas nu pegbaya' u pebian dinilan nu nga sakup bigay mu dinaan. ¹¹ Mekauli' nau tu ni'a, mekawa' u dinig lumbang kini, laak ki nga sakupu kini, dini pailan lumbang. Uu Ama', mekesuun ka, Ama'! Ingat mu ilan, pebian di ginuung nu ngalan mu, ki ngalan bigay mu dinaan, adun meksyalabuuk ilan ma'niin nu keksyalabuuk ta. ¹² Sinegay diin pau nilan, iningatu ilan gupia pebian di ginuung nu ngalan mu bigay mu dinaan. Pilayu' u ilan tu melaat, kaas nda'i mbeleng, subay su getaw tindu'an dun mbeleng tu'pu'. Iini mbeleng adun menuud su sinulat dengantu di Misulat Talu' mu. ¹³ Nandaw sunguu muli' tu ni'a, kaas su saanan ku dini pa lumbang, pektelu'en ku ini, adun meleep di nga sakupuig leliagu muka' megela'ig leliag nilan. ¹⁴ Pitendayu dadema dinilan su pimuun mu dinaan. Kaas binanta ilan nu nga kilawan dig lumbang kini, pu' kana' nailan duma nu nga kilawan, ma'niin dinaan, kana' u duma nu nga kilawan. ¹⁵ Mendadi, kana' iini pekpenenebiin kui kekpawa' mu

dinilan dig lumbang kini, pu' iini pinenabiu dini'a, pelayu' mu ilan di Palin, adun ndi' ilan metalin. ¹⁶ Kana'u duma nu nga kilawan dig lumbang kini. Mesama da, kana' dailan dema duma ditu. ¹⁷ Pegwakil mu ilan dig lawas mu pebian di metuud. Iini metuud su talu' mu. ¹⁸ Sinugu'u ilan mekpelak ilan di tibuuk benwa maa' nu kesugu' mu dinaan kediniin ku lumbang. ¹⁹ Muka' pegwakilu dini'aig lawasu gumanti' di kepatay nilan, adun mpegwakil dailan dema dini'a tantu.

²⁰ “Naa ki nga sakupu kini, kana' laak ilani penenebian ku, pu' duun pai nga metuudan dinaan saba' nu gukiten nilan. Naa, ilan pai penenebian ku, ²¹ adun megela' ilan meksalabuuk, ma'niin nu keksalabuuk ta di ginaa. Iini mauya'an ku, Ama', salabuuk ilan di ginaa, launan nilan, pu' adun metuudan dun su nga kilawan dig lumbang pu' ya'ai suminugu' dinaan tu'u medini. ²² Su kelengas nu pegbaya'u bigay mu dinaan, bigayu dadema dinilan, adun meksalabuuk dailan dema ma'niin keksalabuuk ta. ²³ Miksalabuuku dinilan muka' suminalabuuka dinaan, pu' adun mengganget su keksalabuuk nilan. Mesuunan dayun nu nga kilawan pu' sinugu' mau medini muka' pitail mu su nga sakupu maa' nu kepetail mu dinaan.”

²⁴ Diksu' ni Isus ki kenenabinen, “Naa, uu Ama'! Iini mauya'an ku dadema, su nga sakup bigay mu dinaan, dumunut ilan dinaan pia tanda'u, adun maita' nilan su kelengas nu pegbaya'u bigay mu dinaan saba' nu kepetail mu dinaan, sa' nda' pa mbaalig lumbang. ²⁵ Ama', mekesuun ka! Nda' sambat su nga kilawan dini'a, laak dagid naan, suminambatu dini'a muka' ki nga sakupu kini, misuunan nilan pu' sinugu' mau. ²⁶ Inukitan ku ilan mekatag dini'a muka' ukitan ku pa gusay, adun mengganget dig delendeman nilan su kepetail mu dinaan, muka' adun meksalabuuk ami nu nga sakupu kini.”

18

*Su Kedaap dini Isus**(Mateo 26:47-56; Marcos 14:43-50; Lucas 22:47-53)*

¹ Naa bena' mitubus menenabi si Isus, gumiwa' dia, ilan nu nga sakupen, duminipag ilan tu sapa' Kidron. Duuni pegimulanan gayu dia, sumiled dayun dia si nga Isus.

² Naa kini si Judas, su mektipu dini Isus, misuunaneni pegimulanan gayu kia, pu' tatap pekpungunay ni Isus, ilan nu nga sakupen. ³ Mendadi, minangay si Judas dia pegimulanan, inunutanen diai nga sundalu nu getaw Roma muka' nga pegingat tu Penedapan tu Megbebaya', ki sinugu' nu nga kaunutan nug belian nu getaw Judea muka' nu nga Pariseo. Misangkap ilan besi muka' tilaw.

⁴ Mendadi si Isus, kagina daanen na mesuunay sug launan mpenggulaula diniin, suminungkak dinilan, kali' saak dinilan, "Ta' taway duni pekpenegaun niu?"

⁵ Kali' ilan sembag, "Si Isus, getaw Nazaret."

"Naan main," laung ni Isus.

Naa pegindeg dia si Judas, su mektipu diniin, kam-pu' nu melaun dumanen kia. ⁶ Sikna mitalu' ni Isus dinilan, "Naan," mingegdud ilan, mikedingkalang ilan tanan. ⁷ Sinaak puli' ni Isus dinilan, "Ta' taway dun daani penengaun niu?"

Laung nilan puli', "Si Isus, getaw Nazaret."

⁸ Kali' dayun pektalu' si Isus, "Naa, tinalu'u na daan dinu pu' naan main kini. Mendadi sa' naan da laaki penengaun niu, ndi' da niu peduma ki ngag dumau kini."

⁹ (Kaas ma'niai tinalu' ni Isus, pu' adun menuud ki kinen-abinen kamun, laungen, "Uu Ama', su nga piglegetawan ku bigay mu dinaan, pia sala tawan, nda'i mibeleng dun dinaan.")

¹⁰ Naa si Simon Pedro, duunig badungen. Binakuten dayun, tinigbaseni gulipen nu Tampusan Metaas Belian

nu getaw Judea. Miseksipi sedibaluy telinganen, dapit lintunen. Su ngalan nu gulipen kia, si Malco. ¹¹ Kali' pektalu' si Isus dini Pedro, “Baa, guma' muig badung mu kiin! Ki tasa mipenu' kelegenay pininum dinaan nu Gama'u, ndi'u ba tebuken?”

Iwit si Isus tu Gedapan ni Anas

¹² Mendadi dinaap si Isus nu nga sundalu muka' nu nga kaunutan nilan sampay su nga pegingat sinugu' nu getaw Judea. Pinalik nilan dayun. ¹³ Bekna, inagak nilan tu ni Anas, iin su penugangan ni Caifas, su Tampusan Metaas Belian nu getaw Judea di taun kia. ¹⁴ Naa si Caifasi miktalu' kiin tu nga kaunutan nu getaw Judea pu' papas sala tawani gumanti' di kepatay nu tiba'an getaw.

Mimalaw dini Isus si Pedro

(Mateo 26:69-70; Marcos 14:66-68; Lucas 22:55-57)

¹⁵ Naa kini si Pedro, miglendug dini Isus, dumaneni sala tawan samasakupen. Kagina minilala nu Tampusan Metaas Belian su sala sakup ni Isus kia, mikegdunut iin dini Isus suled diag lenu'an nug balay nu Tampusan Metaas Belian. ¹⁶ Laak si Pedro, pegindeg pa diag liu, mesempel tu genga'an nug lenu'an. Dayun puli' gumiwa' su sala sakup kia, migabitabit dayun tug delaga migingat tu genga'an, piseleden dayun si Pedro diag lenu'an. ¹⁷ Sinaak dayun nug delaga kia dini Pedro, “Kana'a ba sakup dadema nu getaw kiin?”

“Baa, kana' lai,” laung ni Pedro.

¹⁸ Naa su nga sesugu'en muka' su nga megingat dia, miguklak ilan musing, pu' metegdaw dia. Pemegindeg ilan menalang dia, luminamug dayun dinilan pegindeg si Pedro, menalang dadema.

Sinaakan si Isus nu Tampusan Metaas Belian nu Getaw Judea

(Mateo 26:59-66; Marcos 14:55-64; Lucas 22:66-71)

¹⁹ Mendadi su Tampusan Metaas Belian, sinaakanen si Isus mekatag di nga sakupen muka' tu tinitulu'en.

²⁰ Kali' sembag si Isus, “Ki tinalu'u, pinluksadu tu tiba'an getaw. Lelayunu mikpetu'un dia nga simbaan nu getaw Judea muka' ditu Pengedapan tu Megbebaya', dia tanda' pekpungunan nu kelaun getaw. Nda'i talu'u mileglud.

²¹ Naa mauma dema sinaakan mau? Melengas iini pene-naakan mu, su nga mikedengeg tu tinalu'u kitu, sa' ta' alanduni tinalu'u dinilan. Pu' misuunan nilani tinalu'u.”

²² Sikna mitalu' ni Isus, dinapi' dayun nu sala tawan pegingat migindeg dia, laungen, “Masi' mekaku'a sumbag ma'nia di Tampusan Metaas Belian?”

²³ Kali' sembag si Isus, “Sa' mikektalu'u melaat, melen-gas peglegintuud mu di nga getaw kini. Dagid sa' metuudi tinalu'u, naa mauma dema depi'en mau dun?”

²⁴ Mendadi, sinugu' dayun ni Anas egaken si Isus, pinalik pa gusay, ditu ni Caifas, su sala Tampusan Metaas Belian.

Mimalaw puli' si Pedro dini Isus

(Mateo 26:71-75; Marcos 14:69-72; Lucas 22:58-62)

²⁵ Naa kini si Simon Pedro, pegindeg pa diag lenu'an ni Anas, bineeg menalang. Sinaak nu ngag dumanen dia, “Kana'a ba sakup pa pagid nu getaw kiin?”

Dagid mimalaw puli' si Pedro, laungen, “Baa, kana' lai.”

²⁶ Naa duuni sesugu'en nu Tampusan Metaas Belian dia, beta'an nu getaw kia tinigbas ni Pedroi telinganen. Iin, suminaak pelum dini Pedro, “Kana' ba ya'a su minita'u dumanen ditu pegimulanan gayu kitu?”

²⁷ “Baa, kana' lai!” laung ni Pedro. Iin na demai keguni manuk.

Dinangat si Isus tu Gedapan ni Pilato

(Mateo 27:1-2, 11-14; Marcos 15:1-5; Lucas 23:1-5)

²⁸ Naa bena' puti' delagay, su nga kaunutan nu getaw Judea, inagak nilan si Isus tug balay nu gubirnadur genat diag balay ni Caifas. Laak nda' nilan dayun seledayig balay kia, adun ndi' ilan melemu'an, mbuus ndi' ilan meka'aan tug Lebungan gindan ditug Linius. ²⁹ Mendadi ki gubirnadur kia si Pilato, lumiu dia gedapan nilan, sinaakanen dayun ilan, laungen, “Mendadi, ta' alandunig dangat niu mekatag di getaw kini?”

³⁰ Kali' sembag su nga kaunutan kini, “Naa sa' kana' da mikesala'i getaw kiin, ndi' nami sia pegwakil dini'a.”

³¹ Kali' sembag si Pilato, “Naa sa' ma'antu, uit niu iin adun ukumen niu mekatag dig bala'ud niu.”

Kali' ilan sembag, “Naa ndi' mesu'at, pu' nda'i pegbaya' nami ukuman namii getaw laga' na ginaanen.” ³² (Kinii mipenggulaula, adun menuud ki tinalu' kiin ni Isus, su pisuunen pedaan kig bian nu kepatayen.)

³³ Sa' ma'nia, sumiled puli' si Pilato diag balayen, sinabinen si Isus. Mendadi suminaak dayun si Pilato diniin, “Naa, metuud ba, ya'ai gadi' nu getaw Judea?”

³⁴ Kali' sembag si Isus, “Ki sinaak mu kini, dani'a da delendeman, atawaka lain getaw mai miktalu' dun dini'a mekatag dinaan?”

³⁵ Kali' sembag si Pilato, “Laung mu dun getaw Judea mau? Su nga kaunutan niu muka' su nga kaunutan nug belian niui migwakil dini'a dinaan. Naa, ta' alanduni melaat pinggulaula mu?”

³⁶ Kali' pektalu' si Isus, “Ki keglekaunutan ku, kana' miksekat dig lumbang kini. Sa' upama miksekat sia dig lumbang kini, naa sumugut sia su nga sakupu, adun ndi'u mpegwakil tu nga kaunutan nu getaw Judea. Digid

ki keglekaunutan ku, kana' daan miksekat dig lumbang kini!"

³⁷ Sinaak pelum ni Pilato, "Mendadi, gadi'a ba?"

Kali' sembag si Isus, "Ya'a mai miktalu' dun pu' gadi'u. Iini migigetawu dun muka' iini luminusadu dun dinig lumbang, pu' adun peglegintuuden ku su metuud. Adin su getaw mektalenten tu metuud, mekineeg tu talu'u."

³⁸ Laung ni Pilato, "Naa sa' ma'antu, ta' mai metuud?"

Inukuman na tu'u Petain si Isus

(Mateo 27:15-31; Marcos 15:6-20; Lucas 23:13-25)

Bena' mideksu' mektalu' si Pilato kia, lumiu puli' dia gedapan nu nga getaw Judea. Kali' pektalu' dinilan, "Ki getaw kini, nda'idun mai misima'u sala'en. ³⁹ Dagitid kagina duunig betad niu beluyen kui sala tawan pinikutan metaang dig Lumpuk niu gindan tug Linius, naa ta' ma? Mauya'an niu beluyen ku diniu ki gadi' nu getaw Judea?"

⁴⁰ Mimeksay ilan dayun sumbag, laung nilan, "Kana' iin! Si Barabasi mauya'an nami!" (Naa si Barabas kia, tulisan.)

19

¹ Tubus itu si Isus, pibadas ni Pilato tu nga sundalu.

² Miglingkin ilan dugi, tautau tundek gadi', dayun nilan peselup di gulunen. Muka' pikselukan nilan melambung suub gempula, tautau suub gadi'. ³ Minadap ilan dayun diniin, laung nilan, "Naa mpianan ka, Sir, Gadi'a daw nu nga getaw Judea!" Pinemalan nilan padun depi'ay si Isus.

⁴ Mendadi si Pilato, lumiu na pelum dia gedapan nu melaun getaw kia, kali' pektalu' dinilan, "Naa bentayay pa daan niu, pediniin ku puli' iin di gedapan niu, adun mesuunan niu pu' nda'idun ma daani misima'u sala'en."

⁵ Lumiu dayun si Isus dia gedapan nu nga getaw, piselupan pa tundek dugi kia muka' piselukan pa nu melambung

suub gempula. Laung ni Pilato tu nga getaw, “Naa, bentayay pa daan niu! Kini na su getaw!”

⁶ Mendadi ki nga kaunutan nug belian kini muka' nga megingat tu Pengedapan tu Megbebaya', sa' minita' nilan si Isus, mimeksay ilan, laung nilan, “Lensangen di kurus! Lensangen di kurus!”

Laung ni Pilato dinilan, “Naa, alap niu, yamu nai lansang dun di kurus. Naan, nda'idun daan tu'ui misima'u sala'en.”

⁷ Kali' pelum sembag su nga melaun getaw, “Duunig bala'ud nami subay matayi getaw kiin, pu' inangkenen iin sug Bata' nu Megbebaya'.”

⁸ Sikna midengeg ni Pilato su tinalu' nilan, migiseg laaki gendeken. ⁹ Sumiled puli' diag balayen, sinaaken puli' dini Isus, “Naa ta' mai tantu pigenatan mu?”

Laak dagid nda' sembag si Isus. ¹⁰ Laung ni Pilato diniin, “Masi' ndi' mau sembagen? Nda' mu ba mesuunay pu' duuni pegbaya'u lekaten ka atawaka lensangen ka di kurus?”

¹¹ Simbag ni Isus, “Nda'idun siai pegbaya' mu dinaan, sa' kana' laak bigay dini'a nu Megbebaya'. Kaas su getaw migwakil dinaan dini'a, iini gembagel paduni sala'en.”

¹² Bena' midengeg ni Pilato, anguten dun gupia beluyenen si Isus. Dagid mimeksay puli' su nga getaw Judea, laung nilan, “Sa' beluyen mu ki getaw kiin, kana'a sugut nu tampusan gadi' si Cesar! Adin su mekpe'adi'adi', mingatu iin dini Cesar!”

¹³ Sikna midengeg ni Pilato, iwiten puli' diag liu si Isus. Migingkud dayun si Pilato ditu gingkudan pengukuman bitang dia tanda' piningalan dun “Platapurma Batu.” (Piningalan dun di Hinebreo su platapurma kia, “Gabata.”) ¹⁴ Naa su gendaw kia, Birnis, su pengandam dig Lumpuk tug Linius. Bena' sungu mektui gendaw, laung

ni Pilato tu nga getaw Judea, “Bentayay pa daan niu, kini na ki gadi' niu!”

¹⁵ Laak dagid mimeksay ilan, laung nilan, “Petain! Petain! Lensangen di kurus!”

“Lensangen ku ba su gadi' niu?” sinaak ni Pilato.

Simbag nu nga kaunutan nug belian, “Nda'i gadi' nami subay si Cesar.”

¹⁶ Dayun pegwakil ni Pilato si Isus dinilan, pu' adun lensangen nilan di kurus.

Su Kelansang dini Isus tu Kurus

(Mateo 27:32-44; Marcos 15:21-32; Lucas 23:26-43)

Mendadi, inagak si Isus nu nga sundalu ¹⁷ lumiu ilan dia syudad, si Isusi mekpisan di kurusen. Sa' ma'nia, midepet ilan dia dapit nu syudad piningalan dun “Tulan Gulu.” (Di Hinebreo, piningalan dun “Golgota.”) ¹⁸ Dia nilan dayun lensangay tu kurus si Isus. Piduma nilan dadema lensangayig dua' tawan, miktimpang di kurus ni Isus su kurus nilan, dia titenga' si Isus. ¹⁹ Mikpesulat dayun si Pilato tu'us pidekepen tu kurus, iini sinulat dun, “Kini si Isus, getaw Nazaret, su Gadi' nu nga getaw Judea.”

²⁰ Melaun getaw Judea mikebasa dun, pu' mesempel tu syudad sug linsangan dini Isus. Muka' ki tu'us kia, misulat di Hinebreo muka' dig Linatin sampay di Ginerecia.*

²¹ Naa ki nga kaunutan nug belian nu getaw Judea, kali' ilan pektalu' dini Pilato, “Ndi' mu sia pesulat ‘Kini su Gadi' nu nga getaw Judea.’ Melengas sia iini pesulat mu, ‘Laung nu getaw kini, naan, laung, su Gadi' nu nga getaw Judea.’”

²² Kali' sembag si Pilato, “Ki pisulatu, ndi' pelinen.”

²³ Bena' milansang nilan na tu kurus si Isus, inalap nu nga sundalu su nga penepetenen. Pikilas nilan paat

* ^{19:20} ^{19:20} Iin su pikebitan nu getaw Judea, su getaw Roma, sampay sug danu getaw Grecia.

ilasan, piksailas dinilan. Inalap dadema nilan su melambung suuben. Kagina nda'i tinai'anen pu' tinibuuki kabel dun, ²⁴ laung nilan, “Ndi' ta gediten, pekteliin ta, sa' adin dun dinitai mekalap dun.” Kini mipenggulaula adun menuud su sinulat dengantu ditu Misulat Talu' nu Megbebaya', laung,

“Pikilas nilan su nga penepeten ku, muka' su melambung suubu, piktali nilan.”

Naa ma'antu dademai binaal nu nga sundalu kia.

²⁵ Naa pegindeg dia mesempel nu kurus ni Isus su gina'en muka' su pated nu gina'en libun, sampay si Maria sawa ni Cleofas, kepaaten si Maria Magdalena. ²⁶ Naa bena' minita' ni Isus pegindeg dia su gina'en muka' su sakupen kiin su petailenen gupia, laungen tu gina'en, “Libun, bentayay mu pa daan, kini naig bata' mu.”

²⁷ Muka' laungen tu sakupen kia, “Bentayay mu pa daan, kini nai gina' mu.” Kaas genat itu, piuli' na nu sakupen kia su gina' ni Isus diag balayen.

Su Kepatay na ni Isus

(Mateo 27:45-56; Marcos 15:33-41; Lucas 23:44-49)

²⁸ Tubus itu, misuunan ni Isus pu' mitubus na su kelaun mpenggulaula. Mendadi adun megela' gupia menuud su sinulat dengantu ditu Misulat Talu' nu Megbebaya' mekatag diniin, laungen, “Kuaunu.”

²⁹ Naa duunig ya'ung dia, mipenu' penguinumen. Inulem dun dayuni maa' palas napes, tinangen di gayu sigbet, pisangal dayun tug baba' ni Isus. ³⁰ Mendadi si Isus, bena' mitubus megeksep di penguinumen kia, miktalu', “Naa, mitubus na!”

Migdunggu' dayun, muka' migetusi ginaanen.

Tinugda'an Telawan su Gilid ni Isus

³¹ Mendadi inubug nu nga kaunutan nu nga getaw Judea dini Pilato, beli'en nilan su geksud nu ngag linansang kia adun matay ilan ganam, pu' adun egwatan ilan dayun dia nga kurus. Pu' su gendaw kia, Birnis, pengandam di Gendaw Pelali nilan, ndi' pia sa' duunig bangkay mbilin di nga kurus di Gendaw Pelali kia, pu' pegbesaan gupia gendaw. ³² Sa' ma'nia, minangay su nga sundalu megbali' di geksud nug bekna getaw linansang di gupid ni Isus, dayun sug dumanen. ³³ Laak bena' mikpesempel ilan dini Isus, minita' nilan pu' minatay na, kaas nda' nilan iin beli'ay geksud. ³⁴ Laak dagid sala tawan sundalu, tinugda'anen telawan su gilid ni Isus. Mibugyag dayun di gilidenig dugu' muka' tubig. ³⁵ (Naa su mikaita' dun gupia kini, iini migukit dun, adun metuudan amu dun. Ki takesi'en kini, minget metuud, pinanteken pu' metuud.) ³⁶ Ma'antui mipenggulaula, adun menuud su sinulat dengantu ditu Misulat Talu' nu Megbebaya', laung, "Nda'ig bekegen mbali', pia salabuuk." ³⁷ Muka' duun paduni sala sinulat dun, laung, "Pegenlengan nilan su tinugda'an nilan."

Libeng si Isus

(Mateo 27:57-61; Marcos 15:42-47; Lucas 23:50-56)

³⁸ Mendadi tubus itu si Jose, getaw dig lunsud Arimatea, inubugen dini Pilato, elapenen sug bangkay ni Isus. (Si Jose, sakup ni Isus, laak melegludi kesakupen, pu' mendek tu nga kaunutan nu getaw Judea.) Sinangu' dadema ni Pilato. Naa sa' ma'nia, inangay dayun ni Jose egwatay dia kurus sug bangkay ni Isus. ³⁹ Naa si Nicodemo, su Pariseo kiin kuminita' begudiin dini Isus gebii, migdunut dini Jose, peguit si Nicodemo lima pulu' kilui piglamug pagemut piningalan dun mira muka' aloe. ⁴⁰ Mendadi bena' miagwat nilan dua' sug bangkay ni Isus, pinutus

nilan dayun di penepeten gemputi' pidumanan pagemut, pu' iinig betad nu getaw Judea sa' meglebeng ilan. ⁴¹ Naa duuni pegimulanan gayu dia mesempel tug linsangan dini Isus, duuni sangyab dia begu luakay, ki nda' mainsan melebengay getaw. ⁴² Naa kagina mitaang di pengandam di Gendaw Pelali nu getaw Judea, linagut nilan lebengay sug bangkay ni Isus dia sangyab kia, pu' mesempel da dia.

20

Su Ketubu' Puli' ni Isus

(Mateo 28:1-8; Marcos 16:1-8; Lucas 24:1-12)

¹ Mendadi bena' sikna siselem di gendaw Duminggu, si Maria Magdalena, milapus mangay ditu sangyab, medelemelem pa. Mendadi bena' minateng si Maria, iini minita'en, su gembagel batu tinakep tu sangyab, masi' inawa' na dia. ² Gumibek dayun si Maria, linaawanen si Simon Pedro muka' su sala tawan sakup kiin ni Isus, su petailenen gupia. Kali' pektalu' dinilan si Maria, "Inawa' nilan tug lebengen su Kaunutan! Nda' nami suunay sa' adin nilan bitang!"

³ Sikna midengeg ni Pedro muka' su sala tawan sakup kia, miditu ilan dema sangyab. ⁴ Minggebek ilan dua', laak su sala tawan sakup, miunanen si Pedro, iini miuna dateng diag lebeng. ⁵ Bena' midepet dia sangyab, migdunggu' mekselip diag dialem, minita'en dia su penepeten kamun pinutus dig bangkay ni Isus. ⁶ Laak nda'en suutay su sangyab. Mikelendug si Pedro, suminuut dayun diag dialem sangyab. Minita'en dayun dia su penepeten gemputi', ⁷ muka' ki tulapuk kamun pinutus tu gulu ni Isus, dia da pagid, laak nda' melamug dia, mipain da melulun. ⁸ Miglendug dayun suled su sala tawan sakup kia, su miuna dateng dia sangyab. Bena' minita'eni kebetang nu penepeten, mituudan dun dayun.

⁹ (Pu' kiin, nda' gusay mesabut nu nga sakup ni Isus kia su sinulat dengantu ditu Misulat Talu' nu Megbebaya' pu' subay metubu' puli' iin.) ¹⁰ Mendadi, minuli' dayun sug dua' tawan kia sakup ni Isus.

Mikpaita' si Isus dini Maria Magdalena
(Mateo 28:9-10; Marcos 16:9-11)

¹¹ Naa si Maria kia, pegindeg diag liu nu sangyab, luminalek. Mendadi selianen lumalek, migdunggu' mekselip diag dialem sangyab. ¹² Minita'en masi' diag dialem dua' tawan sesugu'en nu Megbebaya' getaw langit mikseluk gemputi', pegingkud ilan dia tanda' bililidan dini Isus. Sala tawan, dia dapit gulunanen, sala tawan di sikwayanen. ¹³ Kali' ilan pektalu', "Libun, ta' mai mingaduya dun?"

Kali' sembag, "Duuni migalap tug bangkay nu Kaunutan ku, muka' nda'u suunay sa' adin bitang!"

¹⁴ Sikna mitalu' ni Maria, luminingay. Minita'en dayun, si Isus, pegindeg dia gupiden. Laak nda'en mailala. ¹⁵ Sinabi ni Isus, "Libun, ta' mai mingaduya dun? Ta' taway duni penengaun mu?"

Laung dun dayun ni Maria, kia su megingat tu pegimulanayan gayu kia. Laungen diniin, "Naa Sir, sa' ya'ai migawa' dun dini, pesuun mu dinaan sa' adin mu bitang, adun engain ku."

¹⁶ "Maria!" laung ni Isus.

Sikna midengegen, minadap diniin, mitalu'en di Hinebreo, "Rabboni!" (Guluganen, "Mekpetu'un.")

¹⁷ "Ndi' mau peguiday," laung ni Isus. "Pu' nda' pau ke-lentu puli' ditu Gama'u. Naa, angaya ditu nga kepetedan ku, talu' mu dinilan pu' luntuu puli' ditu Gama'u, ki Gama' nilan dema, ditu Megbebaya' pektemuyen ku, ki pektemuyen nilan dema."

¹⁸ Linaawan dayun ni Maria su nga sakupen, inukiten dinilan pu' minita'en su Kaunutan, muka' pitendayen dema dinilan ki pimuun kia ni Isus diniin.

Mikpaita' si Isus di nga Sakupen

(Mateo 28:16-20; Marcos 16:14-18; Lucas 24:36-49)

¹⁹ Naa bena' gebii kia di gendaw Duminggu, mabu' duun nai tulug bata', su nga sakup ni Isus, mipungun ilan dia salabuuk balay, piksiba'an nilan tekepay sug balay, pu' mindek ilan tu nga kaunutan nu getaw Judea. Mendadi, mitekaw metua' si Isus, suminaing dinilan meginding. Kali' pektalu', "Naa, gempiai ginaa niu." ²⁰ Mitubusen telu'ay, pinita'en dinilan ki kemeten muka' giliden. Mipati' ilan leliagay saba' minita' nilan su Kaunutan. ²¹ Kali' puli' pektalu' si Isus dinilan, "Gempiai ginaa niu. Mendadi, sugu'en ku amu mangay megukit, maa' nu kesugu' dinaan nu Gama'u." ²² Sikna mitalu'en, pisengawanen ilan ginaa, dunut mektalu', "Tabuk niu ini Balakat nu Megbebaya'. ²³ Mendadi yamu, adin su getaw pedesunen niui sala'en, mpedasun tu'u. Muka' adin su getaw ndi' niu pedesuneni sala'en, ndi' dema mpedasun."

Migdua'dua'ig Delendeman ni Tomas

²⁴ Naa sala tawan di nga sepulu' bu' dua' tawan sakup ni Isus, si Tomas (piningalan dun su Gapid), nda' kedunut dinilan su ketua' ni Isus dinilan kia. ²⁵ Mendadi inukitan nu nga samasakupen si Tomas, laung nilan, "Minita' nami su Kaunutan!"

Kali' sembag si Tomas, "Naan, ndi'u metuudan dun, subay maita'u pa ki pali' nug lansang dia kemeten muka' mpulegu, sampay mpulegu ki giliden."

²⁶ Naa tubus itu bena' walu gebii na, mipungun puli' su nga sakup ni Isus dig dialem balay, minampu' dinilan si Tomas. Mendadi, tinakep puli' sug balay, laak

pia ma'antu, mitekaw na pelum metua' si Isus, suminaing mindeg dinilan, laungen, “Naa, gempiai ginaa niu.”
²⁷ Laung dayun ni Isus dini Tomas, “Bentayay mu pa daan ki kemetu kini, puleg mu tendu' mu. Muka' tenggal mui kemet mu, puleg mui gilidu. Ndi' mu dega pegdua'du-a'ayig delendeman mu dinaan, petuuda dinaan!”

²⁸ Simbag ni Tomas diniin, “Ya'ai Kaunutan ku, ya'ai Megbebaya' pektemuyen ku!”

²⁹ Laung dayun ni Isus, “Mituudan ka ba dinaan saba' minita' mau? Labi na leliagen ki nga getaw nda' mekaita' dinaan, laak muka' mituudan ilan dinaan!”

Su Pikpuunan nu Kesulat dig Libru kini

³⁰ Naa, melaun pai tu'us pinggulaula ni Isus di gedapan nu nga sakupen, laak nda' mesulat dig libru kini. ³¹ Laak su gikteben kini, sinulat adun metuudan amu dun pu' si Isus su Tindu' nu Megbebaya' Meglekaunutan, sug Bata' nu Megbebaya'. Pu' sa' metuudan amu dun, naa mpeduma amu tu ketubu' nda'i tamanen meksekat tu pegbaya'en.

21

Mikpaita' si Isus di Pitu Tawan Sakupen

¹ Genat itu, si Isus, mikpaita' na pelum di nga sakupen diag Linaw Tiberias. Kiniig bian nu mipenggulaula. ² Si Simon Pedro, si Tomas (piningalan dun su Gapid), si Natanael (getaw Cana sakup Galilea), sug dua' tawan bata' ni Sebedeo, muka' dua' tawan pai sakup, mipungun ilan dia geksid linaw. ³ Mendadi laung ni Simon Pedro tu ngag dumanen, “Naan, menegutusu.”

“Megdunut ami dini'a,” laung nu ngag dumanen. Luminulan ilan dayun di sekayan. Piglegendawan ilan dayun memaling, nda' ilan tanan mekelaam. ⁴ Bena' dumilag na, pegindeg si Isus dia geksid linaw, laak nda'

mailala nu nga sakupen kia. ⁵ Kali' tawag si Isus, “Naa lai, mikelaam damu?”

“Baa, nda',” simbag nilan.

⁶ Kali' pektalu' si Isus, “Dia niu ektakayig baling niu dapit lintu nu sekayan niu kia. Mekelaam amu dayun.” Iktak nilan tu'u sug baling, dayun nda' nilan megaga betunay puli', saba' kelaun seda' milaam nilan.

⁷ Naa sala tawan dinilan, ki sakup ni Isus kiin petailenen gupia, kali' pektalu' dini Pedro, “Su Kaunutan maia!” Sikna midengeg ni Pedro pu' su Kaunutan si Isus, mikseluk dayun suuben (pu' migluas suub kamun), suminampak dayun dia tubig, luminanguy. ⁸ Su ngag dumanen, suminakay ilan dema pangay dia geksid, pegbintengen nilan sug baling mipenu' seda'. Mesempel dailan di geksid, mabu' lima pulu' depa saanig layu'en. ⁹ Bena' mikekawas ilan tu geksid, minita' nilani guklak musing, duuni seda' tiniti' muka' duun dademai pan dia. ¹⁰ Laung ni Isus dinilan, “Uit niu dinii santa' buuk di seda' kia milaam niu.”

¹¹ Mendadi duminangan puli' si Simon Pedro tu sekayan, biniglasen dayun di pentadan sug baling, mipenu' mekebagel seda', megatus bu' lima pulu' bu' telu buukig launen. Laak pia ma'antu, nda' peglegetus sug baling. ¹² Laung dayun ni Isus dinilan, “Pedini amu, maan naita.” Naa, nda'iduni mikaku' sumaak diniin sa' ta' taway dun iin, pu' misuunan nilan iin su Kaunutan. ¹³ Mendadi, inimud ni Isus su pan, dayunen pentulunay dinilan. Ma'antu dadema su seda'.

¹⁴ Kiai ketelunen mekpaita' si Isus di nga sakupen genat tu kepetubu' puli' diniin.

Su Kegyaga ni Isus muka' ni Pedro

¹⁵ Naa bena' mitubus ilan maan, sinaak ni Isus dini Simon Pedro, “Uu Simon, bata'a ni Juan, petailen mau ba, labi pa di kepetail dinaan nu ngag duma mu kini?”

“Wa'a, Kaunutan,” simbago ni Pedro, “suunan mu pu' petailen ku ya'a.”

Kali' pektalu' si Isus, “Naa sa' ma'antu, tagikul mu ki nga maa' nu nati karniruu.” ¹⁶ Sinaak puli' ni Isus, “Simon, bata'a ni Juan, petailen mau ba?”

“Wa'a, Kaunutan,” simbagen puli', “suunan mu pu' petailen ku ya'a.”

Kali' puli' pektalu' si Isus, “Naa, ingat mu su nga karniruu.” ¹⁷ Ketelu deksu'en na sumaak si Isus, laungen, “Simon, bata'a ni Juan, petailen mau ba?”

Sikna midengeg ni Simon Pedro su ketelunen sumaak, “Petailen mau ba?” milegenan dun. Laung ni Pedro, “Uu Kaunutan, misuunan mu sug launanen, kaas suunan mu pu' petailen ku ya'a!”

Kali' pektalu' si Isus diniin, “Tagikul mu daan su nga karniruu. ¹⁸ Muka' taman talu'u dini'a, su begu getawa pa, mimakesa, dayun pia adini mauya'an mu gengayan mu, medituun ka dayun. Laak dagid sa' megulanga na, subay tenggalen muig baingken mu, adun mbaluda nug lain getaw, dayun ka egakay tu kana' mu mauya'an gengayan.” ¹⁹ (Naa ki tinalu' kia ni Isus, pisuunen diniin kig bian nu kepatay ni Pedro, adun megleepig dengegan nu Megbebaya'.) Laung ni Isus dini Pedro, “Naa, dunuta dinaan!”

Su Suminulat dig Libru kini

²⁰ Naa kini si Pedro, miglingay, minita'en dayun meglendug ki sakup kia ni Isus su petailenen gupia, su pegingkid dia gupid ni Isus su pinganaan nilan nu gebii kiin muka' sinaaken, “Uu Kaunutan, ta' taway duni tumipu pa dini'a?” ²¹ Sikna minita' ni Pedro ki sala tawan

sakup kia, sinaaken dini Isus, “Naa Kaunutan, ki getaw kia, ta'i mpenggulaulanen?”

²² Kali' sembag si Isus dini Pedro, “Sa' mauya'an ku pu' metubu' iin sampay matengu puli', naa ta' maig labet mu dun? Ya'a, dunuta dinaan!”

²³ Mendadi duun dayuni gukiten mipelak tu nga sakup ni Isus, ndi' daw matay ki sakupen kia. Laak dagid nda' metalu' ni Isus pu' ndi' matay. Iini tinalu'en, “Sa' mauya'an ku pu' metubu' iin sampay matengu puli', naa ya'a, ta' maig labet mu dun?”

²⁴ Naa su sakupen kia, iinen iin su suminulat dun ini, muka' piglegintuuden sug launan mipenggulaula. Misuunan ta pu' metuudi pingukiten.

Deksu'an

²⁵ Naa melaun pa pinggulaula ni Isus. Sa' sia gela'en sulatay, mabu' ndi' megela' dig dibabaw lumbang ki ngag libru mesulat.

Kig Begu Pasad: Ki talu' nug megbebaya' (Bagong Tipan:
Maayong balita alang kanimo)

Subanen, Central: Kig Begu Pasad: Ki talu' nug megbebaya' (Bagong
Tipan: Maayong balita alang kanimo) New Testament

copyright © 1993 Wycliffe Bible Translators, Inc.

Language: Central Subanen

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 13 Jun
2022

e39efc58-c45f-53c6-990e-d3cd833e20b4